

保德州志

卷十一至卷十二

記

重修城壁創開西門記

見名宦 李晏

大定二十有一年春有司請完城郭朝廷以邊為先務啓塞從時鳩工三萬命長貳督之舊城皆因山而為雖高下不齊而頗堅固獨西南一方歲時輒圯召故老訊之僉曰山勢隨河而傾下多沮洳加以溝洫不濬而又修築者不慎故頻年至此若非改圖終不能久也予眎之信然相土之宜退十數步得木瓜崖亦隨其形勢裁削壁立且堅且厚其卑者猶數仞其廣五步其袤凡一百七十步有奇上則平之即加以堞下則溝之即為之池中之缺斷者簣土以補之疊石為渠以通水潦起於二月上旬迄月晦而畢實省其功役之半城中素無水宋熙寧間鑿數井皆湮塞泥不可食居民汲城外澗泉以供日用先是由北門往還詰曲數里不勝其勞遂因石渠之上累甃為洞創作西門焉距泉所纔百步餘民甚便之落成之日熙熙然咸願刻石以記噫民可與樂成難與慮始今之為政者多行姑息媮隋苟且不為久計每修完者

保德州志

卷十一 藝文中

一

亦聊復已耳故朝設板而夕已敗不知反害民力也滋多食人之食者寧不愧於心乎於是直書其事以勸諸後來者并董役之官吏姓名於石之陰識其歲月云

此西門在

孫家溝稍北今西門之有五十步

石渠記

明戶部尚書三邊總督都察院在都御史 張珩 南川人

嘉靖甲寅秋九月保德守藍公作城下石渠成保民利之巧余文紀諸石余夙知藍公政績先是余僑慶陽夜半風雷大作雨下如注負郭居民被墊者三千餘家民謠頻歲刻吏肆詆積冤千和不泮旬除藍公節推於慶抵任御史行部機讞環慶一路獄公明決公恕平反甚多遂得列薦剡陟守保德郊別有難色余日移所以治慶者於保何有無何余再撫延綏聞公政聲視慶益振公復移書請曰保德邊郡民固相信矣邇來套寇猖獗不時入寇若深犯嵐保腹背受敵計將安出茲欲深溝高壘寓戰於守何如余復書以為然公乃登城盱眙相地勢南高北下且先年霖雨潰決東北城垣百丈餘有謂棄舊垣南徙里許築之便公曰城枕黃河據形勝如若輩議使

寇自北南侵殊失河山表裏之險僉服其言乃鳩工伐石甃棄土爲久遠圖其東北爲一渠長三十丈闊二丈深一丈使水東流入於河西北爲一渠長二十餘丈闊深如東北渠使水北流入於河正西爲二渠各長十丈餘闊深如前使水由西溝曲流入於河其工始於是年六月下旬歷三月而竣事其他女牆門垣傾圮者罔不完葺用資保障復恪遵道憲葛公方略積威建堡誓衆伐謀以舒華夏之氣吁苟凡長吏相效率屬協力經畫何寇患之足慮哉公之治保允符於慶矣余因保人之請爰揚慶保相與之誼以見作渠禦寇本末云若其循良之政立遺兩地甘棠之思則有採風者在公姓藍諱蓼字子雨號與石辛卯鄉進士錦衣籍楊州人

重修城垣記

明孝廉王環
河曲人

保德僻處晉西北之窮壤連河接陝密邇套寇冰堅輒侵犯城低薄不足恃嘉靖癸亥李公諱春芳號西屏者直隸井陘人也奉命來茲入境即有寇驚迺肅隊戒行比視事閱城慨然曰孤懸邊城傾圮若是萬一有警將何以支於是乘民力之暇爲修

保德州志

卷十一 藝文中

二

葺之計低者高之薄者厚之女牆樓舍悉增其制西南隅長六百尺乃受敵之地高厚尤加焉南門闔閣舊土築更以磚石仍建巍樓於上城內相地甃井以備不虞關外復置暗窖塞邪徑以絕寇謀鄉野之民堡岩可守者令完之墩堠可增者新築之願入城而無房基者給空閑官地以安處之數月餘次第成蹟民恃無恐公復慮傷於所恃乃出守城議禦寇方略授之挺身臨城嚴督夫卒習火炮利器械信義以壯其膽賞罰以作其氣舉凡料敵制變進攻退守之術諄諄曉諭如教兒曹然甲子冬寇大肆猖蹶興嵐臨石咸受荼毒而州之人晏然安堵公之全活一方功豈小補云哉庠生崔宮等思保障之功欲勒諸石以示永久徵余文余以城非其時者譏城非其制者譏公之城保德安內攘外合時與制其仲山甫之城東方乎紀以風後盛舉也雖然公之德政詎止修城已哉飭泮宮以重學校均租田以清稅糧訊疑獄以申冤抑制強橫以安良善河神有廟以理幽養濟有院以明人節妄費以惠下罷冗役以蘇困暮夜無金以貞廉也瑣細不察以順治也盛德寵功薰蒸於人之耳目而迥

出於修城之上者難以悉述今陞克二守督撫萬公復保留太原則公之政蹟可知也敢並記之

新甌州城記

明兩浙鹽運使司
運副順天府尹 萬自約 郡人

保德故樓煩地距北寇百里外僅隔一垣而套牧者盈盈一河耳寒沍水結望之數舍可騎而來又城西外地皆坦衍受敵隸所卒更單弱往嘉靖甲子以來寇凡七抵城下可鏡也先是壬辰歲當事者方圖城事而適有西警王守所尚議需三萬金役稱是且以三年期焉功方始而輒不果州之士民皇皇然冀保於城不啻歲之望也韓守至而岢嵐兵使趙公行部慨然謀復舉韓守唯唯於是上制撫及御史臺允其請趙公復遴同知張君通判于君暨韓守更議蓋不擾州民一錢一力也議犁然具諸臺亟下趙公董其成而議中凡用積羨若干士伍若干爲時幾何令始下州士民相顧咨曰卽官帑具矣役無煩農畝也僅僅期以三時其必徼鬼之工而能然哉韓守則曰是不然城盛事也州人恃以爲命矣匪謀曷濟匪豫曷立即臺使者業已悉

保德州志

卷十一 藝文中

三

捐公儲矣而我何不殫力也於是與諸士民謀曰山固饒石去城數武耳乃自行石所拘逋伍者餉五百十名先募石人治於山北冬春而石齒齒待用也又舊構具率臨時採取無論遲之旬時卽此輩日疲之力何可它驚也於是相轉假及諭工者人登事率持一具構具不勞而足灰用人牛輓之爲力不易有官航在可藉視之取給六步者固倍之也其它瑣瑣凡慮所省不貲以故用銀三千役四千亡論曩者不啻徑庭卽三郡首共約劑者亦所減居多已自春季始事訖秋杪而竣計城一千一百丈有奇堞高五尺下石上警門四樓樓之木偶得於某所適足用焉城成而州之士民忽然若自天而有之也相與驚惟大服曰吾州之城而有待於今如此哉子來勿亟維神之力其今之謂矣乃韓守退然謝不敢當曰父老固天幸此諸臺使之所大造而民耳吾擊磬鼓右手不倦則有之然不敢不告成事焉遂承趙公指而屬文於不佞不佞方病廢且以不敏辭顧不佞晉產也往從父老所談邊警至今猶震悸不寧今吾晉業受主上賜邊鄙不聳而諸臺使者又狡焉是思惟吾圉之固不佞何

敢以晏然一日而忘其自哉第竊嘆有土者民命攸寄一切不爲苟幸無事往往以六傳視之即有大舉又佗然曰此何不嫌爲也不爾即循虛聲瞽上耳目之所及於前而後勿與知如是則民何賴焉今諸臺使能策韓守而韓守自殫其力以副之是不爲無爲與藉口以嫌自解已倘邊圉將吏乘時之暇人人不負其職則天子何終西顧哉是役也諸臺使提衡於上業已建豎不有厥功乃克底成績救寧一州烏不
忘也制臺先亞卿梅公始允其議今少保楊公日厯桑土衣茹之謀而大中丞白公與楊公合其議以力主之共紓壯猷旦夕匪懈按臺先趙公今汪公持風采以閱軍實於茲城皆深注意焉今疏於朝行將以殊異待韓守孰謂材也而不由之激以勸之成哉若兵使趙公往來部中荒慶惟勤始終其事與先後諸蹟可並睹矣不佞不能已於維桑之慶故遂紀之

修城西南面記

見進士 姜宗呂

郡隅處西徼以僻稱兼之水礮山童壤瘠民勞故俗淳易治代幾閱興廢從未聞有

保德州志

卷十一 藝文中

四

梗化稽命者順治己丑葦鎮首難秦晉煽動郡介西河之衝不戢者與有謀焉迨王旅以恢疆至坐困七浹月志城之堅而難墮也礮碎西南面殆盡郡侯安公蓋躬閱而眸擊之矣歲越辛卯師凱旋公思以新之亟上牘當事者斬請公家帑當事格於功令靳弗予且督之設處維時燹而浸繼正厯長孺慮役弗遑也及秋小有公曰信勞時使此其期矣乎迺首捐俸百金爲衆倡營守郭公繼先捐廿金學博劉公衍民如之城居入合捐二百金都甲合捐四百五十金營兵合捐三百七十金縉旣集鳩匠募徒庀材具餼俱有定謨首秋始事抄而役迄凡爲工八十丈有奇爲期三月餘睥睨隍塹屹焉煥焉無忝初畫與事者圖貞珉以志之余曰是誠不可無志也已夫城以衛民圯而弗葺譬孰大焉然葺矣而役是亟弗時之審弗謀之同是利之而實厲之益之譽也公數上牘請公帑慮勞費之貽我民也請弗獲而役不可已復遲回者數月始戒事焉乃愚難慮始區畫之功猶蹙然有難色公弗少沮曰是固固若圍以謚若居也於是勞怨罔恤壞堞復完爲斯州垂永禩苞桑計公之功與金湯爭高

深矣公諱世鼎字鑄九遼之東寧人爲從龍名守其平定安集活我州人者不可殫述而祇述其奏成於茲舉者有如此

擬江樓記

見職完顏名缺

樓之名有謂之齊雲者蓋取其雲之高而欲齊之於其上也謂之疊嶂者蓋取其山之遠而欲疊之於其前也皆取其彼之所有而此能有之以名爾保德軍署之北依城爲樓下瞰黃河前人以擬江勝之庸非取其江之所有而此能有之耶余調官來此太守迺皇族性天昭徹心地平坦過人遠甚嘗於休務之日率僚屬來飲於其上周覽山河之形勝一日屬余爲記欲廣擬江之制余因喜躍而應之曰夫天下之物有勢可同而未必能同者有勢不可同而強使之同者有形勢異地里遠不約而自同者樓之與雲其勢可同者也登焉而雲猶在其上豈非未必能同者歟樓之與山其勢不可同者也登焉而山果列於其前豈非強使之同者歟曰江曰河論其形勢則遠矣較其地里則遠矣而登是樓也觀其兩山傍峙一河中流浪平風穩而綽有

保德州志

卷十一 藝文中

五

江之景者亘古如是豈非不約而自同者歟謂之擬江端不吾欺而其在人也亦有然者苟得其形勢異地里遠不約而自同之義相與論江河比擬之趣則可以神受意解而不負樓之名矣若夫簷花過雨而春遠危欄岸柳搖風而涼生畫棟萋淡天高而秋蟾落影於其中樵散漁歸而暮雲飛翼於其下以至山色不離牕而水聲常在耳則天下之樓閣臺榭雖不可勝紀想未易有此景也語至此使妙筆模寫生綃三百尺亦不減錢塘之風色矣彼有區區以青紅相勝詩酒相誇欲復擬此而求記於余余非特不暇亦不敢以上城垣

重修公廨記

見名宦 劉章甫

至正辛卯太守長清許公諱仲傑字漢臣素以廉幹勤敏爲毘陵推官今進階奉直大夫來守是土蒞事之暇四顧垣摧址壞段瓦畫墁慨然嘆曰堂以出政臨民司牧者坐視其頽廢所不忍也於是捐俸經營百廢具舉躬督其役日夜勤勞暨其完也計館舍五十餘間畫簷繪棟翬飛壯麗儀門甬道極其平廠庭栽松柏槐柳左右適

宜外周垣墻百有餘堵嚴竣可觀或肅辦上官所需器用靡不完好

鼎新衙署記

姜宗呂

郡僻處西北徼水佛山童土确民趨燹浸仍之數罹蕩析寧止閭井闕寥碑堞傾圮即公衙臨蒞地亦委之瓦礫郡大夫僦居民舍陋弗恤也歲乙巳攝篆田公始葺舊宇而創居之然制未閱備恐終同僑寓丙午冬三韓張公守茲土下車目靡宇圯廢狀盡焉傷之謂此頽然者署人以傳舍視故因循苟且膜外置之乃日廢一日究至無舍可傳豈徒郡人士之憂抑亦有土者之羞越明年春鳩工飭理慮材具餼敵者易之闕者增之計二堂穿堂書房捲棚寢室以及倉庫厨舍將百楹稱完稱美文稍采形家言凡低昂踈密鮮弗中度訖仲夏而椽桷瓦甍煥然改觀是役也工不勞民費不糜帑多方設處備極苦衷凡一木一石措置咸出心裁指顧所及無煩繩墨尺寸不爽即老匠宿工咸斂手心折古人木屑竹頭總歸有用奚以愈此是以事半功倍費縮初畫美加往模豈非公之大有造於保哉公諱光岳字符巘三韓金湯人乙

保德州志

卷十一 藝文中

六

西貢士

譙樓記

見名周山

洪武二十六年詔天下郡縣作譙樓所以一制度以新天下之耳目也先是有司踵元季之弊因陋就簡罔肯殫心修舉廢墜識者病焉保德僻在西陲譙樓建於中街距州治盡一射惟置鼓以嚴更鐘則立一架而懸於承天寺前與州治相去一百有餘步歷歲滋久勢將傾圮弘治十五年癸亥冬十月予奉命來守是州越明年夏六月摧剝於風雨震陵之餘遂申請於都憲泊藩臬重臣咸允之乃遷建於州治前門之址疊石爲臺臺上爲樓樓下爲門樓之四周繚以欄杆自肇工迄告成前後雖一載而民之樂於勸工者自若不以勞告樓旣成矣予則以爲鐘金屬革屬皆樂之大者八音無金則律呂不能叶其和四時無金則萬物不能遂其成五行無金則四時不能以相生故序四時弁五行冠八音金之德也使譙樓有鼓無鐘可乎故置鼓於譙樓之東以東屬木歸也懸鐘於譙樓之西以西屬金陰也陰陽相配東西相向

千年此鐘鼓則千年此譙樓譙樓鐘鼓相爲悠久於無窮矣若或譙樓之有朽腐鐘鼓之有變壞則在後之守茲土者嗣修之也幕賓古曹陳君直實贊其事上舍鄉耆吏典輩恐久而事泯請言勒珉予不能文姑直筆書此以記歲月云

郡守王公修倉城及公署記

江南無錫貢監 殷夢高 新又

今 上御極以來宵衣旰食勤於萬幾尤加意吏治特勅內外臣僚凡經銓曹擬注者必親引見面詢可者任用其奇材異敏或被顯拔否則罷遣四十三年春東海瀚澠王公以黔陽卓異奉計最到京 上召對乾清門公儀觀備傑敷陳宣暢稱 上旨 上面諭部臣曰王某材堪重任其勿以常選用朕軫念西北近邊一帶民生凋瘵欲得循良牧守爲之撫字卿等俟此處員缺奏 聞朕將特簡焉閱數月前郡守唐公以俸溝陞任部奏缺官 上特旨以公守保德保踞山爲治地皆岡阜下臨大河隔岸河陝西延安府谷界去河套不百里戶僅三四千以丁徭重時復逃亡錢糧不過半萬民俗強悍喜聞輕生歲極易荒少腸即旱少雨即澇又常患雹災及霜早

保德州志

卷十一 藝文中

七

殺禾蓋天下州縣之寒苦未有若保之甚者公始至閱視城池廡舍倉庫等無一修整完好及巡省四境坊郭民多不衣襦袴一村或僅兩三家類皆土窟窟室公蒿目嘆曰吾奉 上命簡任是州以某能撫字此民且堪煩劇也今凋瘵若此緩輯甚難倘任事後或尙有一民失所一事叢脞者即上負 聖天子罪不可追矣於是極意淬勵茹蕞飲水有利必興有害必除民之良善者扶植之奸頑者鋤治之遇水旱賑貸倉穀出納均平貧民之不能入學者設立社師以訓誨之庠序諸生時加課試親閱其文嚴爲評議逾二年政化大行民俗稍變力亦漸裕乃更修舉廢墜以次行之緩急輕重各有條理丙戌先建倉房五間堅固工緻顏曰萬年以期永久蓋藏既謹穀不泯爛丁亥又修北城三十餘丈高三丈六尺言言乞乞幾復舊觀兩役告竣民無罷勞諸父老相率言曰夫公堂者朝廷法紀所由布且百姓之所躋而介壽者也今頽圯日甚蓋以吾等餘力葺治之攸芋攸寧使君庶有慶乎公曰否民役方休吾不可以重煩民爾其少息至己丑父老又請公重違民意爰取累年節省在官公費

買辦木石僱募丁匠由譙樓儀門以及大堂並加整理大堂較舊制崇三尺別構捲棚三楹傍建吏舍庫房築三甬道由儀門直達大堂中立綽楔一座月餘工畢州紳衿士庶雜沓瞻仰咸驚相謂曰我使君未嘗煩擾百姓馨鼓不聞何功成之神速若此且壯麗巍煥自有此州未嘗有此堂也遂稱觥獻羔以落其成公又於署內建小樓三間俯瞰黃河傍眺諸山一郡勝槩盡萃樓上公餘退食嘗與二三知己觴詠其中民時或過樓下莫不指顧欣喜曰此吾郡召伯之所菱舍也噫嘻公何以得此於民哉夫民之情可與共安樂不可與共勞苦故凡有興作雖爲民而民未有不怨且謗者公今以區區山瘠邑屢勤民力民不怨而喜不謗而頌自非平日恩信素孚何以得此天子以公知是州真誠知人善任使矣異時一歲九遷任方面爲封疆大臣所以下撫黎庶上報知遇者循是而推廣之其勛業流天壤功名垂竹帛又寧可量也歟公諱克昌字燕及一字澹齊瀚澗其別號也辛未進士山東青州府臨淄縣人今內陞

保德州志

卷十一 藝文中

八

保德州尉廳壁記

名見職 黃茂

尉之設何昉乎昉於廢封建而列州縣也一郡之內列爵維三曰守曰尉曰監維守與監總治於上尉則分治於下是尉之設所以衛禦斯民佐州牧以出治者也昔人云職無大小顧才不足以塞責良有意矣戊戌之冬余自晉藩庫使遷除斯職蒞任之初問聽事之所咸曰無之兵燹之餘半畝頽垣在城東隅自是繼事者賃民舍而處焉余於是周覽故址悽愴於羣蒿之下嘆曰卑俸幾何半爲棲身者費尉之設豈端使然哉既又自矢曰倘薪水有加搆數椽以蔽風雨亦聊以塞吾責也然而王事鞅掌栝棧不給願莫之遂越七載河曲邑侯三韓田公諱思孔攝蒞州牧到郡之日進僚佐而言曰一二長吏爰居爰處凌雜市廛其如政體何於是撥囊緡策羣力輦糞壤燔榘翳一躡故跡破岸涯而爲之而予之廳亦幸以有成焉越歲餘幼子灝自南服省予菽水之暇散步庭除因指示之曰凡茲前廳後室旁及兩廂即拳石杯土一木一楹實予手之所拮据予足之所胼胝也嘻余滯於此且十年矣人事倥傯僕

夫况瘁髮盡白齒搖落矣古之人有棒爛五綵瑞應雙鵲稱之少府號曰仙吏且朝拜除而夕超擢者不知何幸而獲此迄於今不復遘矣子灝爲我記之聊以誌其概焉

監守官廳記

鄉進士 彭鸞 晉城人

偏頭關西北之重鎮也其建置與保德建封以故糧倉芻場皆隸於州而監厥出納則州之倅掌焉前無官署監收者往往僦營房以治不便成化辛卯山西監察御史張公進祿巡歷過此監收同知黃銳因有所呈乃改僧院爲公館居之稍便但門地低窪雨水積蓄爲汙池出入病涉焉歷癸卯二守鳳翔李公廷蘭繼至不以溢陋爲慮惟嚴出納是務弘治己酉 欽差整飭三關兵備兼督糧儲僉憲古邢王公璿惜其隘陋遂命千戶萬禎相新城中隙地一所庀材鳩工創建公館凡一十九間經始於是年孟秋朔日落成於次月既望館既成二守恐創建之功久而不彰乃以記囑予竊惟國之所重者兵兵之所重者食食不足則無以養兵兵不足則無以衛國此

保德州志

卷十一 藝文中

九

爲政者所當先務也矧茲關爲控扼虜寇要地誠非他郡僻靜者比今僉憲公以經濟才居澄清地督餉則倉廩實而食足督兵則武備修而兵足兵食既足則禦寇有本而邊境安矣所謂北門銷鑰豈虛語哉雖然功之大者位必顯也僉憲公之功業建於邊陲著於國省載諸太史之筆已有光矣奚待區區之記所贅言也特以官署之設政令所施之地在治體最爲切要今以數十年未舉之缺漏一旦起而新之此二守所以拳拳有感於心而不忘也後之居是館者尙當以舊告新勉修職業用圖補報則國家簡賢求治之心僉憲公作興之意庶乎其不負矣治道豈無小補也耶

以上衙署

創建文廟記

見名宦 高懷貞

保德軍迺故宋屯戍之地也懷貞到官詢及宣聖祠廟左右曰無之稔聞熙寧間始有太守高公渙創建於城東南坡阪間頃因兵火燬殆盡春秋仲月上丁之禮止於頒詔廳行之矣嗟呼撫定以來於今數十載刺史守臣來者非一能無意於茲乎

壞貞靜而思之昔在宣聖刪詩書定禮樂爲百王之師立萬代之法所謂君君臣臣父父子子夫夫婦婦之義皆本於宣聖君不君臣不臣父不父子不子雖有粟吾得而食諸夫如是而廟貌其可闕乎苟不以儒素爲宗而反以緇黃介抱者經不云乎不愛其親而愛他人不敬其親而敬他人者未之有也壞貞肆謀及同寮謀及秀士謀及員吏皆曰可迺各出俸錢暨軍民願多寡從其所欲而助之遂卜吉於軍衙西百姓庸租之地地方七八畝將建之其父老云此舊宋孔氏所居之地也噫雖世殊事異而偶合者一也而又始創於廣陵今建於懷貞其冥合者二也爰命工人經之營之築之登登百堵皆興構成大厦廟貌一新廊廡四合其規模制度則一出於軍倅解公焉壞貞本陋儒叨宰是邑豈敢文孔子之堂耶但以工畢直紀其事云爾

重建廟學記

見名宦張令臣

鄉里設爲學校三代之所同也儒者宗師仲尼百世所不易也祀孔子於學而配以顏淵魏晉以來尙矣唐貞觀四年詔州縣學皆作孔子廟自是郡邑之有學有廟偏

保德州志

卷十一 藝文中

十

天下保德初號定羗軍宋平河東置以控夏人景德二年改今名本廟開創因其故歷五十餘祀升爲州自建城堞卽爲邊戍地險而瘠民安於險約故必積夕然後庠序可興宋熙寧間守臣高公渙嘗建於郭女之東南毀於兵大定庚寅高公壞貞知軍事卜吉於茲前門傍廡與殿四合內殿復爲函丈之室宣聖十哲像設於室間以孟子居顏氏之次其餘高弟與先儒圖形殿壁明昌甲寅歲王公嘉言作州刺史又起講堂於殿之陰泮宮之制寢以備矣泰和改元冬予守是郡二月上丁致齋見其規模狹隘殊失尊嚴且敝壞不修後將滋甚欲申請於有司慮拘文循例所請不能過數萬未有以處之奈何學正王用傑與諸生進而言曰吾輩蓄念久矣如太守一言則固有願爲者居數日僚吏士庶各輸有差布籌算數總二十七萬有奇予默而計之瓦甃官所有也力役兵所爲也自攻水至於設色其間或易舊以新或從無創有凡物之價與匠之備度以三十萬止今已十之九矣設有未濟以俸續之可也繼而有二車至知事已集亦爲之助於是即日興作先治殿宇改棟梁遷柱礎非務侈

前適求中度次治兩廡則補而葺之塗而鮮之時幾秋仲亟遷聖像完其缺略正冕服之不中制者又立曾子像而升於殿自顓孫子張至劉向繪於左廡自林放至范甯繪於右廡從學令也苟楊王韓未有別室亦分而繪之凡九十有六人明年春復修講堂宋楹桴桶皆易以新以堂之舊材改建齋舍四間八月哉生明乃會賓僚於堂學生自既冠以上皆與席且使落其成則庶幾更相敦勸而朝夕從事也酌酢既奠學客有旅進而前者請曰春秋釋奠自此能備禮矣諸生肄業教化自此而興矣論秀而升行見至此而盛矣可不刻石以紀敢丐其辭予嘉意書其歲月進述前事之本末以授之

重修州學記

見學顏真

保德州本春秋時晉地宋平河東置爲定羗軍歷亡金五十餘祀然後爲州地勢雄偉民俗淳厚公廡之西有

宣聖清廟大定土五年刺史高公所創建也值烽火起毀厥廟貌未復有興逮至元

保德州志

卷十一 藝文中

十一

間前幕儀焦二公重結正殿大德元年知州王公來治是郡公諱濟字齊民祖順德任邑人也出自風憲蒞政之際慨然起遽新之意創塑

先聖十哲金碧丹雘炳耀星日唯州學燕室未備迄大德五年仲秋山東東西道宣慰使塔察兒公河東山西道肅政廉訪使龔公奉命讞治至州公具言保德廟學廢久函丈頗完講堂尙缺劇欲重修所廢爲甚州有公貯材木敢丐經營之資公嘉其言遂竟獲允公即鳩工率役與倅僚協力士民爭趨吏目品大備僉謀吏屬同寅僦工創樹兩齋於左右輪奐翕然彌新樂育諸生郁郁乎洋洋乎聞絃誦之音浹洽四境信乎人能弘道非道弘人道之亨替在人之行否嘻定羗風俗移易日益有望矣

重修廟學記

見鄉賢萬世德

聖人之道得孔子而尊孔子之道以學校而傳學校所關誠至重已國家遯稽三代之治自京師以及郡邑莫不有學所以明聖道而基太平也保德自宋熙寧間守臣

高公渙始建廟學於城東南里許後因兵燹燬今廟學則金大定十二年高公壞貞所建也前守亦間加修葺歷歲寢久土木漸腐萬曆甲午夏太守朱公始下車視學詢及科目僉曰弘正而上青紫接踵庚子後寥寥迄今矣公遂周環眺視謂諸生曰魁星闈而學富敝土不雄發其坐此乎乃移置魁樓而秋闈遂有人焉今年春公復謂諸生日余志修學已久顧保德蕞爾材力不文余當首捐俸緡募工易材經營繕治缺者補之圯者興之坊額未備者標題而增正之階除瓦甃樹株之類罔一不整事竣庠博戚君欲勒貞珉以垂永久乃遣庠士徵記於不佞不佞維天下事疇有重於學校者哉慨自聖遠言湮吾道蓁蕪乃綱常之理不至淪斃者學校維之也而學校興廢則守令責也令朱公是役上不縻公帑下不費民財以養廉之需爲興學之用詎非千秋盛績乎自是士遊其間感激思奮臣盡忠子盡孝斌斌乎興道德而懋事功咸朱公所貽者其有功於吾道大矣卽立石紀功而與斯庠俱永也誰曰不宣公諱黃裳字元吉北直南宮鄉進士

保德州志

卷十一 藝文中

十二

重修廟學記

明天啓問奇
嵐翁政道 楊州鶴

保德廟學金大定年創建明興二百餘載代有損益至嘉隆來敝壞極矣萬曆辛亥胡守卽事仰瞻廟貌以重修爲己任如經閣魁樓化龍橋青雲坊帳幔祭器無不留意餘以時詘闕如也已查儒學懸缺廩餼得二百緡有奇請之督學南公慨然允諾適貳郎之報下付其金於陳鄉官嘉蓋王鄉官所用筦之明年春弟子員馬上後王邵等合詞請於觀察成公求所軍爲之役又遴官之幹力者所掌印孫揚僉屯楊世卿督其事工方興而李守至相與度基庀材鳩工伐石先廟次廡次亭閣堂舍越戊午內移戟門數武舉名宦鄉賢二祠器庫齋所門屏咸治之飭金聲至振坊圍以柵欄儒學門迤北大墻長五十餘丈並加石甃鼎建學宅中寢室東西兩舍前立廳事旁設門吏舍房儀門大門觀瞻肅焉總之撤腐易新丹雘塗聖言言奕奕章甫簞簋之屬靡不煥然信數百年來未有之觀也然經閣後墻基未壘屏墻外臺基未築非完計也陳鄉紳奇瑜李孝廉希清諸生韓貢琛王臯陳奇瑛等乃出已貲以增其未

備工將竣張守視郡甫展謁周迴相視曰東牆嚴立而西牆卑陋不足觀也遂捐俸葺之高與東牆等學博余光印同弟子員趙思廉馬上覲吳季瑜戴君知鮑知變具牘而屬余爲之記余三復之乃知是役也厥功偉哉郡自壬子來科甲聯翻聖賢之英氣有所鍾靈縣縣翼翼良非偶矣士生於今宜飭躬勵行赫若聖臨而凜奉前哲之功有餘師矣工肇於丁巳三月暨辛酉秋竣事歲則五更工則旋舉豈易易哉督學公諱居益號損齋渭南人觀察公諱伯龍字生洲長垣人胡守諱柟字棟隆號再培洵陽人李守諱勝之號蘭畹大興人張守諱世熙字忠明文縣人故併記之

重修文廟記

字禹都 呂崇烈 平陽人

今天子靈精文治臨靡舍菜普天率土奉先師罔敢歎乃余鄉因已丑潢渠煽亂全省震蕩保德爲寇據者閱歲蹂躪更慘孔廟亦爲茂草州人士非不急欲新也而力未遑歲壬辰楊公擢茲守蒞任謁廟見其宮牆傾圮雖殿址僅存不佗風露因顧學博劉公而慨然矢曰是守土之責也爰各捐俸爲倡而紳佩尚義者輸有差漸次

保德州志

卷十一 藝文中

十三

理飭劉公夙夜忘勞寒暑靡懈庀材鳩匠四閱月而頽者起毀者究工竣走力長安徵記於余余曰之役也浸燹甫脫人方生養休息之是軫而卒能翼焉煥焉改厥舊觀落成費金不逾百即學博暨諸弟子員亦自詫其興之之易若邀冥相也者斯非文運將興也與楊公諱士烜號文斗北直通州貢生學博劉公諱衍民字無壞與予同里閩爲筆研交故得詳聞而樂道之董乃事者爲劉生步階馬生政因得併

重修文廟記

蔣弘道

學宮之重於天下也古今無異夫人而知之矣保德僻處三晉之西陲學宮肇自趙宋歷代增修規制不減巨郡但歲久敝極兼以兵燹圯壞有不勝言者前守楊公學博劉公嘗一葺治之然不過補罅塞漏其在於今幾爲瓦礫之場先聖先賢風雨飄搖文昌無宮啓聖無祠尊經閣數椽零落櫺星門兩柱勾連凡百廢墜無庸更僕見者經營有心措置無力祇增浩歎耳古絳張公天翔諱鳳羽性精才敏余幼同筆研識其爲大有爲人也以丁酉經魁俛就廣文一席庚戌春振鐸茲邦入廟展拜怒然

太息奮身任事計工材費甚繁浩點金無術皇皇焉如疚在心幾於寢食兩廢訂一冊捐修勸輸而庠生皆貧窶無以應釀金僅建文昌宮三楹塑莊嚴像金碧之資猶且不給昕夕憂思慮大工終無成期也癸丑計偕入都告於御史孫公錫齡慷慨好義首捐五十金爲衆倡兵部侍郎楊公永寧給事朱公裴御史張公冲翼布政李公翀霄各捐有差凡得百餘緡而歸郡守張公光岳李公遇時欣然助之紳士共輸其力公諷日始事庀材鳩工終日勞勞見星往還指授擘畫舌敝唇焦子夜猶會計不少息先正殿次兩廡次戟門櫺星門次明倫堂齋舍內外五十楹煥然一新若尊經閣若啓聖祠敬一亭若致齋所宰牲所祭器庫神厨咸次第就理又以名宦鄉賢南向非制改列東西移置魁星樓以補風氣皆懸扁額焉儒學門以內起甬道門以外樹坊表焉時值仲秋拜獻有地觀瞻肅於往昔集生徒入兩齋教課靡倦豈弟之色溢眉宇諸生相與樂之徵記以垂不朽余維是役也規制雖不大異於曩基而功力視經始爲倍艱郡人僉云不敢異倖其成而公出其大有爲之才於萬難措手中

保德州志

卷十一 藝文中

十四

卒能磨踵瀝胆成之功甚偉而心良苦矣然後知其心而絀於力者固力有不足亦心有未誠也語云有志者竟成其公之謂乎若夫倡始義舉御史孫公之力居多合一代名公鉅卿爲保德襄茲盛典上以彰朝廷崇儒重道之治下以鼓邊陲興賢育才之風保德人士亦何幸而遭此哉用勒貞珉以告後之視茲學者

重修文廟記

十見進 劉祖舜

爲政之道勸農桑以足民用興學校以教人倫是以古者孝弟力田推爲德行考自虞夏以來王都國邑莫不建學修禮重道崇儒於時民遵禮讓俗尙淳龐我朝創闢洪基續承大統皇上誦法先師敦崇正學駕幸闕里親灑宸章聖學聖治並頌無疆蓋教化之行始於首善以風四方太平之綱也然必庠序之地立而後禮義之教明廉讓之道修而後風俗之美振郡學創始於宋熙寧間元明迄今修廢舉墜歷有碑記可考癸亥地震後殿廡幾裂齋舍胥傾風雨飄搖垣墉弗固越甲子夏五月郡侯高公蒞任茲土即以興學教士爲首務下車謁廟觸目動壞蓋以今距至聖二千二

百有餘歲堯舜禹湯文武之道燦若日星大聖人所留也忍其聽之乃捐俸命工繕葺時則廣文衛公彙集生徒量輸羣力與登仕郎陳公鳩工僦役共親勞瘁而廟貌以新今則採石築度整理東垣宮牆數仞美富藏焉夫太原之西建學有七郡縣公以廉能歷署鄰封飲冰茹蘗養士愛民茲且建立義學倡明教條俾絃誦之士朝課夕糾兆庶之衆聞風慕道負河山鐘靈毓秀之奇守至聖垂憲立教之意於以厚人心振頽俗勵頑鈍鼓賢能上勸聖朝熙皇之化下成斯民懿好之良其有造於斯郡也豈淺鮮哉爰記以誌不朽云高公諱起鳳字鳴岡遼東遼陽人衛公諱大衡字知重平陽府曲沃縣人陳公諱肇虞字嗣華陝西富平人

重修文廟學宮紀略

見學官 劉 瀚

保德文廟創於金由金而元而明以迄國朝定鼎因革損益載在郡乘碑記可考余自辛未銓授承先君子訓不敢以閒散曠厥職壬申癸酉日與同志諸生課舉子業不暇問土木事甲戌下公車倡築儒學照壁後基址丙子捐俸築學宅舊基圍牆七

保德州志

卷十一 藝文中

十五

十二堵沿牆樹以楊柳建櫺星門外西牆照壁以補風氣已卯議移魁閣不果壬午六月同志樂輸魁樓告成先是大殿歷年久遠瓦灰剝落雨雪浸露聖像棟宇浸漶屢議重修逡巡未動癸未仲春請州當事唐公首倡紳衿踴躍從事雖費逾百金大殿煥然一新是年少宰姜公同任平魯公協力慨捐隨重修啓聖祠文昌祠改神路於東齋後建雲路坊立飛龍石補修甬道磚牆八丈工未報完物力不繼甲申三月請州當事發米十石復集紳矜量力議捐重修儒學門立檔路碑更泮池橋石柱修祭器庫增宮牆南北二丈加以重門修金聲玉振坊建元魁坊乙酉二月州當事內陞四月余亦遷陽高衛教授念學宮事多遺憾復請州當事發米十石加尊經閣上下門牕更換儒學大門建明倫堂儀門牌坊修宮牆外水道上鋪以石築文廟南墻下土壩以防崩潰五月新當事王公蒞任適值通學公議裝綠聖像采畫大殿啓聖祠魁樓等處苦爲物力所困衆多畏難不意七月間開工王公倡捐人心響意紳矜而外一時義民亦皆翕然樂輸工不兩月丹雘塗堊金碧重輝若有莫知其然而然

者余竊幸藉州當事之力與同志諸君子多方贊襄以遙觀厥成而迴憶十五年來經營拮据約費錢四百餘緡開誠布公不敢避勞怨於人言物議之中者亦聊以此仰體先君子官牒間散不曠乃職之意且臚列其經理處所始末年月以告後之君子因時補葺或有同志焉是所望耳

勅建文朝幕位記

見學官 殷 魯

聖廟舊無幕達魯花赤慎得斤本雖色目特展誠心始建堂基遽行剏修出俸以爲工匠資親臨督以勞之春秋二丁得以貝衣冠之盛朔望焚奠得以肅恭敬之心崇儒重道豈不厚與

創建泮池記

見進士 陳奇瑜

嘗考泮宮之制東西南南皆有水形如半壁漢明臨雍人環橋門而觀聽所從來矣州之學宮獨未作泮頌思樂者嘆缺典焉歷代相沿議濬不乏人緣後臨戟堦前阻櫺階直需之耳往歲修廟之便遂內移戟門數武業有其地猶未及濬也辛酉秋諸雋

保德州志

卷十一 藝文中

十六

應賓興之典郡牧張公曰此蛟龍雲雨時也池中物其聿興乎乘風破浪泮壁其可緩與乃捐數金簡趙生思廉馬生上覲上行吳生季瑜戴生君知鮑生知變董其役並辦事官崔玉珩奔走規畫廣二十丈五尺徑一丈三尺深七尺有奇中及左右甃石成梁以通往來綠波淪漪誠未有之觀也工將竣而捷報至王生邵郭生天德同登巍科人文淳興獲際其盛適愜我公蒞泮伊教意然而未盡公之意也記曰有文事者必有武備今寇氛未靖逆我顏行日者露布凱旋獻馘獻功胥在於此諸生益得雍容俎豆無虞干戈其所矜奮必倍於往昔公之色笑又當何如工肇於七月初旬迄肅霜竣事公諱世熙字忠明文縣人

飭建學宮牆基記

陳奇瑜

保德文廟建於蓮巒右麓北倚城隈南臨深澗東鄆州治西瞰黃河比歲鼎新煥乎改觀獨西牆傾圯多爲缺陷而南牆立於高陵之上墜頽牆輒與俱曩一使君移墻澗外師生淪胥牆復初制乃得晏然蓋堪輿說應如響云而憾未有爲經久計不拔

者乙丑春郡守戴公始其事以徒役重煩請得本所軍丁百六十名廉戶侯楊君世卿督之西墻旬日告竣南則至深溝以及高陵約二十餘丈上築屹然磚爲水道以防蟻穴凡五閱月落成是役也基固而墻固墻固而廟學永固併比歲鼎新之功藉以不朽遊其中者聯袂雲程實始基之公諱元字起貞汝南鄉進士

觀德亭記

周山

洪武八年奉詔建儒學迨今百餘年而射圃尙未有也予自弘治壬戌歲來守是州相學旁隙地立爲射圃率諸士子習射於中適朝廷例下立射圃令儒生俱習射欲得文武全才以効用予維射之爲藝久矣自軒后作弧矢始其後因之遂有五射之制蓋因是以觀其德也射義曰射者周旋必中禮內志正外體直然後持弓矢審固諸士子苟能正其志直其體持弓矢審固進退周旋中禮則知所謹而德於此乎在矣

創建學宮文昌祠記

見學官張鳳羽

保德州志

卷十一 藝文中

十七

天下學宮皆設文昌帝君祠蓋以帝君職司文衡察士林之善惡掌官司之祿秩有功於斯文者匪淺鮮也羽庚戌春受事茲庠見文昌位於啓聖公几案疑而異之詢其故僉曰神無正祠久矣噫嘻神無正祠其何以展敬乎亟集縉紳士子共謀之釀金三十有奇選材鳩工於明倫堂左隙地建正殿三楹東南隅廡厦一間越明年癸丑治龕塑像侍從御衛兩列東西加以繪飾煥然有金碧之輝夫而後春秋享祀瞻廟貌而得以展敬矣諸生曰學宮有文昌祠常制耳第祠之建於今日則創舉也似不可無以記之羽因援筆而述其事督工庠生徐發廩生王治勤勞有功

初建文廟魁星閣記

見學官劉瀚

按誌州治魁閣有二一在青雲坊東南一在大殿東隅在東南者刺史胡公加意修葺在殿隅者規制低隘南爲廡墻所掩闔焉無光春秋祀事瞻拜無地己卯春諸同人課業倫堂請建魁樓於尊經閣後外豎兩楹迤爲懸閣塑像其中迎河瀾之紆折舒文脉之光華輿論謂於學校大有裨益迺爲時迫未及鳩工先請木主閣上以供

香火節年歲歉厥工未興壬午仲夏諸同人奮然曰神已棲止風雨飄搖保無怨恫耶公請謀諸紳謀諸郡當事唐公公曰可捐俸首倡一時諸同人翕然量力樂輸有差旬月之間工始告竣先是閣久傾圮登者股栗板易以厚墻砌以磚堅久永固未必於根本之地無小補也行看科第聯輝五星聚焉文明之兆在此矣余不文爲誌其始末年月如左

社學記

見裁 賈允恪

古者家有塾黨有庠術有序國有學養人才以端化本厥制甚廣所以治隆俗美非後世所能及自塾庠序學之制廢秦漢而下未之能復迨我太祖龍飛掃近代之陋習挽上世之淳風詔天下府州縣立儒學社學迄今百有餘歲而保德社學未舉有司之罪也弘治壬戌周公來守是州下車即以學校爲重臨講堂與諸生講論經史既又曰教人莫先於養蒙蒙養弗端長益浮靡社學之所係也大矣及詢故址僉曰無有爰假館設教以十二生訓童蒙明年學憲王公按臨教讀率童蒙生約三百

保德州志

卷十一 藝文中

十八

餘迎道旁環列王公喟然嘆曰人物俊秀可嘉也遴選其尤者得四十人進入學補弟子員未入學者亦翕然知所向每朔望隨班謁廟觀少長之序習揖遜之容誌講堂環聽畢各還社學讀書周公集先正格言一帙名曰訓蒙集要梓行與之書讀刊朱子韓子勸學文爲字格使之摹倣可謂以善養人者矣又相草場隙地建城東社學革去淫祠建城西社學於太平巷堂宇一新觀者起敬僉謂周公此舉上有以副國家化民成俗之意下有以舉有司廢墜因循之典文教振於一方絃歌作於千里誠盛事也教讀李玘等請記以垂不朽予維社學即塾序之遺意所謂小學也小學所以立大學之基苟能自茲而進於明德新民之實學則庶乎其不差矣爾童蒙尙其念之哉公諱山號安齋浙江嵎縣人以上學校

田賦記

見舉 楊應辰 郡人

州僻在西北距京師千餘里人多以邊陲易之然庀其本根葛藟猶有待於枝葉而况天下乎故捍禦北寇使不得肆其蹂躪之毒以虔劉我上國者州爲之障也是保

德功擅藩屏視東南之郡縣爲重而國家緩征以壽命脉視東南之百姓爲急顧有田則有賦凡隸職方皆然吾保德豈敢後乎特以保德之粟輸之宣大相距無慮八九百里吾小民背負擔輪者或上下山壑出入溪澗以致墮其所輸者有矣幸而免於巖險或蓋藏之不備燥濕之不時以致陳腐不可食者有矣墮其所輸是傷民財也欺以陳腐是虧公義也虧公義則民偷傷民財則國貧二者皆非事宜而可行也夫東南財賦水陸並進輸之遠方可也使西北而同之難矣况保德爲戎馬之衝內設千戶所東調太原鎮西軍其經費亦多矣兼以時或有警萬寵雲屯雖累年之積不足以供一日之用顧可悉索吾賦輸於宣大數百里外而失用戒不虞之策耶吾友張子應正德六年貢因言曰保德田賦困於遠輸而逋負亡命者十室有九國朝仁民之政不冒天下獨斬於一郡乎吾當具狀以聞及入太學果上疏論之越明日下部議可其奏吾郡得以息肩於宣大雖婦女小子皆德張子之深也司訓濟寧袁公宗儒署州事因民懇請立石率生員張文明高科來命余祈禱誠而上天有晴

保德州志

卷十一 藝文中

十九

雨之應和氣盜而黃河無堅水之積賦稅均而戶口有日增之慶公之所以治郡者其概如此皆可書也彼區區一倉之建不過有司之常事耳予何記哉姑書此以塞陳君之請云

甄修倉廩記

正見學 余天秩

設倉儲糧裕國也倉務興廢關於國計本州倉土築有年旋葺旋壞鼠穴其中每致虧損民勞而財傷官亦苦之萬曆二十年議磚包城工興而以寧夏變報罷所儲甄石積在無用明年太守王公諱甲者具申巡撫呂公兵備楊公以前所儲甄石包本州倉撥州所軍壯供其役委官郭南翰督其工倉中央建當已亭爲公所正北大廩一座甄石爲址磚磚爲堵而以瓦覆其上工未竟而公有變二之擢矣余承乏攝州事用成公意修東南西廩四座建西廩後小廩一座規制皆如正北廩倉院通用磚砌四圍開水渠南牆亦用磚石甄疊下通水道前後共修廩房二十七間牆一百二十丈工起夏中迄秋盡而落成焉謹勒珉以紀歲月因念昔魯爲長府閔子騫日仍

舊貫何必改作顧天下事有不可膠柱論者仍便則從仍改便則從改要在節民耳今是役也墉垣是堅鼠害既杜虧折可免一勞永逸上以裕國而吾民財力亦節於無窮何莫非子騫氏意也者因設屯於忻州而地所遙隔雖有屯田之名實無耕獲之利厥糧每石徵折色銀五錢於忻民之佃種者軍餘索租輸官往返千里勞費呻吟近例復增至八錢以故所人因於稱貸餘丁灰燼流移四方軍士支吾逋逃過半時署所事指揮同知朱鈺本所千戶揚寰戚焉而例不得減值皇上御極之三年特命總理鹽法御史龐公清查屯務乃令總旗范海等以苦累告龐公受理檄下參政范公僉事孫公議之咸以事關利害欲得諳練營務者托焉轉下本府同知李公以公嘗守保德所人之累其夙悉也公視牘果忻然曰所人其將蘇乎遂議以爲晉省屯糧每畝起科不過三升二合忻之民地每畝最重者亦不過五升有奇獨該所屯田實徵糧九升八合三抄彼此較量大相懸絕况軍隸保德地坐忻州相去五百餘里多土人佃種利不能什一而徵科之苦岌岌乎力不能勝且屯地皆錯列萬山之

保德州志

卷十一 藝文中

二十

中岡阜相連並無水利可資蓄洩間有平田亦多山澗相參不成丘段重以災寇頻年人丁之喪亡略盡其何以堪命乎宜將保德所屯糧照依每石徵銀五錢之例庶寬一分民受一分之賜錢糧歲解逋負屯丁得免流移而防禦亦有資矣龍公聞之慨然曰是議也眞悉民隱而上達者乎據議請裁奉 旨依議行欽此欽遵每石徵銀五錢永爲定規夫損上益下軍餘之困蘇矣非公之仁心碩畫何以獲此宜刻石以水傳也抑考屯田之設其利有三一日固守禦之備趙充國之法也二日省轉輸之勞諸葛公之計也三日足國家之用郭元振之制也若本所屯糧幹旋微公而竟以八錢爲額則流移逋負求其如古三說者得歟公之議遠鑒漢唐近復祖制酌古準今誠久安長治之策也豈一時小補云哉公諱春芳字茂元別號西屏井陘其籍也

湔除倉害

見前 苗朝陽

國家不患用之不足而患其不適於用蓋用不足爲竭澤猶可以生之而無害也惟

是可用而不適於用將朽蠹之害有不可勝言者自非掌邦計者酌盈濟虛以爲久計民之瘳也其何日之有保德逼臨套寇邊儲之所係綦重顧頻年來倉米有不足之患麥豆有有餘之患沍爛耗蠹之禍至令數十年經收之人猶有蕩家析骸之苦流毒甚矣如本邑麥每年實徵二百六十八石五斗有奇至積千有餘石蓋舊麥無出孔而新麥無論已如黑豆每年實徵五百九十七石有奇除入衛兵馬歲支尙餘一百九十七石雖先任戶部邵公沈公節次允州守胡公之請悉坐放河保營然尙未有成命永遵也是皆有餘之患也又如本邑米每年實徵六百八石有奇保德所軍上半年應支米六百四十餘石入衛兵應支二百餘石計實少米二百五十餘石是則不足之患也夫不足之患病在國有餘之患病在民是胡可無經久計乎州守胡公殷殷慮之酌議以請戶部陳公灼見其害慨然允行以保德所上半年本邑給三個月米外給三個月麥則麥不至有餘而米不至不足矣以節年餘豆准放河保營四十三年春季三個月而又每年坐放州倉一個月則舊豆不至樸滿而新豆不

保德州志

卷十一 藝文中

二十一

至積薪矣所謂可用而適於用所以無不足也上以佐國家之急爲忠計下以甦閭閻之苦爲福民近以紓士大夫之憂爲訏謀遠以貽億萬載之規爲永利宜土民勒石以紀之也顧公節鎮三關在在士飽馬騰行且秉鉞登樞措九邊萬國於衽席寧惟是一郡倉庾仰荷剔刷已耳不佞伏處河濱快覩良法謹次其巔末如此云公諱陞號抑吾辛丑進士河南夏邑人也

永草里老倉級記

國朝進士 龔榮遇 監利人 府谷知縣

均徭起而庫收興粒米征而倉收設雖地方有大小錢糧有多寡必設收銀收糧兩役今昔同然也保德孤立邊陲坡地窮民四里有半兵荒逃亡以來僅十存一二丁日減而徭日增脂膏已竭田日荒而賦日益骨髓隨枯猶日正差正糧勢不容已也至里老收銀倉級收糧兩役日久滋弊耗費繁殷小民因應役幫貼而散亡者不可勝計郡侯孟公甫下車而心傷之一切私費以及吏胥科索積弊清除殆盡猶恐未足垂久幸直指白公請 旨嚴禁民害八款而簽民解銀居其一適合公意遂集耆

老紳衿告之曰民解止爲里老一害千瘡百孔誰其長叫九閩今欽遵 聖意而廣之拔本塞源革此兩大害以與民休息於有永夫州之門差糧折僅四千兩有奇募兩人收之工食各十二兩一年一換起解在官支收在吏庫收不與焉人何憚於收銀本邑倉糧僅二千石有奇募四人收之工食各六兩亦一年一換季報在官支放在吏倉收不與焉人何憚於收糧其他一切解報註銷往來收關所出量設公費以貯之權宜轉重差遺得人既無不貲之費又塞侵欺之孔此誠官民兩便經久不易之道也議定行之塗歌巷舞舉欣欣然仰觀德政而公適遷汀守攀轅無從焉檠檠小民驚美政未久疑後廢堪虞相與聚族而謀貞珉於直指白公之左右向予索記以垂後予慨然曰居官未有不愛百姓者獨事關重大始虞納履之召嫌終幸脫肩之有地安有視民如子知罪聽人如公之實心實政可法可傳者予司牧隣邑知公素悉且懽然於保良之生全有日也敢忘固陋直書以答州人之請使後之守是州者無能廢公良法云公諱熊臣字輔昌由廕生知是州今陞福建汀州府和府

保德州志

卷十一 藝文中

二十二

倉記

見裁 姚沂

州治之西儒學之旁有曰保德倉者乃州治儲糧以供軍餉之所也先是苟簡東西各一廩中一廩東南一廩北與西皆瓦礫地周垣卑矮廩皆土壁爲盜窺竊弘治壬戌冬浙之崧邑周公來守是郡下車即以興廢舉墜爲己責首州治次學校次壇壝凡百修舉每月詣州倉放千戶所官軍俸糧見其勢將傾圮鼠雀穿壁敝不勝言於是相工計材先後申請都憲魏公何公充支公帑措置規畫命張廷禎等董其成焉廩有六以禮樂射御書數顏之每廩樹楹二十有四材木惟良瓦甃惟堅內構木板外砌磚石下亦以木板墊之使鳥鼠之患去狗盜之萌消外繚崇垣七十六丈俱覆以瓦中爲司賦廳廳前爲大門門前樹以綽屑扁曰國計肇事於甲子三月畢工於乙丑五月雖逾朞年而民罔告勞落成吏目古曹陳君希正率吏耆張義等請勒珉傳遠予惟國計莫重於餉而餉非倉廩莫貯倉廩之修良不可苟也周公之守是州凡所施皆自其所蘊發之以故將三載而百廢具舉文教以興田野以治訟獄以清

爲之記余惟田賦一疏上足以昭我國朝納言之美下足以昭我張子敢言之節誠盛德事也雖拙於文義容已乎稽之唐虞三代自列土以至百工庶人皆有諫所以徹弊政求民瘼也漢唐而下此意微矣太祖高皇帝之有天下他務未遑首下求言之詔故唐仲實以韋布之士而訪及民事張真以行伍之卒而論及邊情百有餘年聖子神孫克守家法而益大之張子上田賦之疏不惟不以出位爲罪而且下其疏於郡縣使遵行焉夫豈漢唐惡聽人言之主能彷彿其萬一哉此尤可書者也夫控僣艱難之時紀綱雖設而未備進言者恃之以無恐至於重熙累治則大小之事各有攸司治理已精且備雖欲求民隱而開不諱之門草茅却顧者亦豈肯越職抗疏以有言也仲實輩言於創業之初張子言於守成之後余以張子爲難能也張子誠勿足乎所能而漸進其所未能叔孫豹所論不朽者庶幾可異此石不足以限也否則不待石之僵什斷缺而德泯矣可畏哉張子名綬字朝儀常以孝行著於鄉里蓋善人也惟善人能受盡言故重之以規

保德州志

卷十一 藝文中

二十三

議減屯賦記

廩生 莊邦彥 郡人

國朝宣德間設所於州東控三關西禦河湟當晉西北之衝議者謂宜倣古屯田制然州地陵壑阻隘無閒曠可屯雖然墉垣堅矣得無有墮廉隅之飭懷穿窬之心者乎鼠害杜矣得無有稔計於貪饕伏奸於鼠竊者乎故或浮入以抽羨盈或慳出以私餘剩或賄賣而指虛作實或那移而掙有爲無種種蠹弊有甚於垣頽鼠害者多矣國與民又奚賴焉凡我同計尙其戒哉

嚴革斗庫記

見進士 姜 櫛

國家創制立法準人情因風俗固亦甚便於民百世無弊也而奉行不善勢必藉法容奸而積重難返以至上下交田則有如保郡所設公費一項者保郡地瘠民貧土地廣袤不過百里而深溝大壑居其半人民五都十百戶門則不過四千而俱屬下下總地丁合計歲入不過五千有奇牧是邑者即止飲黃河一杯水而錢糧起解事上接下費不能支取之額外固仁人之所隱痛而莫可如何者也前令張公集紳矜

士民而幾經籌畫酌令每都十甲甲各一年年各百兩聽民公議貧富以定上下名曰斗庫公費而俗呼曰富民差十百戶所入亦準是焉一時官民兩便迨因循既久侵漁者有之那移者有之虛糜中飽者有之甚且頑梗之民反得脫漏而柔懦者乃益加重種種弊生官冒虛名民受實禍貧者愈貧而富者亦貧背鄉井而散四方踵相接也不有仁人將何以善其後宛陵唐父母來蒞茲土仁厚爲心公正爲質釐奸摘弊時頻蹙曰民不堪命一至此乎亟思痛革與民更始適值西陲多事軍興旁午加以塘路供應日不暇給遷延數年是蓋有大不得已於中而非其心之果愨然也近幸 朝廷無事海內又安各上憲廉法淬勵徹底冰清公毅然曰吾意中有欲行而不得行者此其時也去年春取十百戶公費已盡革去既立石焉今歲仲夏復將里甲斗庫曉諭永革且集紳矜士民而示之曰此余蒞任來所不能愨然者今始得遂吾願也民困旣蘇輿情大快咸欣欣然喜相告曰我公誠仁人也是不可不鑄之石以垂永久於是乎記

保德州志

卷十一 藝文中

二十四

蠲所公費記

姜 櫛

民力之匱至保而極保力之疲於所爲甚雖然取所人而賦之國之定制也取所人賦之以佐常賦之不足所之往例也盡所人賦之所不足而深悉其弊而存恤焉其思莫大也仁人曰所吾瘠子吾所憇父欲概減於例之中如貂之取勢旣有所不能欲取盈於例之內爲秦之視心實有所不忍於是躊躇度焉審慮焉焦其心勞其思寬夫一使民受一之賜緩其二使不至如三之離爰進所人而噢咻之曰視爾籍而釐然核爾口而枵然物故逋亡額不得縮而存者償之爾之困幾又州多下門而所有上戶非所富而州貧蓋丁寡而徭重爾之困幾且向者困設於忻因而人處於外徼徭往返動以千里皆爾寥寥殘丁當之爾之困又幾不能請命而稍減於額外忍因循而盡諉之例自茲以往公家之誅求於爾乎報罷寧捉襟而露肘寧左支而右詘寧那移而假貸不於爾所重困也於是所人歡騰踴躍如出於湯火如登之衽席擬爲登堂之酌兜擬爲華封之祝堯仁人曰無庸而所人且愁然有後慮也曰仁人恤

吾蒞吾土且數季知吾故恤吾後有仁人新蒞吾土未必即知吾安得遂恤吾也蓋爲文以告之後之仁人皆仁人之賜仁人日俞仁人則郡侯宣城唐公諱文德字敬亭也以上田賦倉儲等

重修城隍廟記

見學 阿思蘭

公而無私者神也生而有欲者人也神非人無以彰其靈人非神無以表其誠寂然不動之中有感而遂通之理矧城隍者尤國家之正神主萬民之禍福者也雖曰吉凶在人災祥在德而所感在此所應在彼孰謂上下左右而無之云乎哉州判張公敏觀廟貌圯壞不敝風雨惻然有易故從新之念異日會同僚知州林奉訓等允協其論各輸俵以成其事於是乎經營謀度樑杗有朽者易之垣墉有缺者築之金碧丹牖日星炳耀梓匠繩墨之巧柱礎瓦甍之功蓋有不期然而自至者苟非一念之誠有以感動人心疇克臻茲由是使後之祀之者歆然肅凜然畏儼然而起敬矣落成之日郡士大夫請余之說辭不獲故直書其事云

保德州志

卷十一 藝文中

二十五

重修城隍廟記

見前 賈允恪

保德在春秋爲林胡在宋爲定羌軍又改保德軍尋立爲州自金而元至我國朝爲州爲縣不一金元時已有城隍廟國朝太祖皇帝臨御之三年正祀典始定神號神之所司者廕庇一方福善禍淫陰也人之所司者政行一郡勸善懲惡陽也陰陽所司相爲表裏故凡封境之內神祠廟貌皆當致敬而修葺之况神乃一州之主祀又非他神可比其廠宇寢殿兩司前門歲久傾頽神無以棲其靈而人又何以蒙其福耶弘治壬戌冬十月浙江岷縣周公奉命來守是州慨然有重修之心奈歲歉未遑越明年癸亥春夏亢暘禾稼枯槁周公齋沐率僚屬士民祈禱於廟遍祀神祇甘霖隨降三日乃止官民咸喜周公遂捐俸爲倡衆知城隍爲民而立周公爲民而修樂輸從事罔有吝怠凡檁桷梁棟磚瓦墻壁之類朽腐者易之傾倒者植之改舊爲新外有周垣後有寢殿左右翼以兩司不數日而落成耆老張義等請予爲記勒諸貞石以垂不朽於乎廟宇成而城隍之靈以安城隍安而周公之心亦安神人胥慶兆

民允殖理之必然者若周公非慢神虐民者矣然豈但修一城隍廟而已其他羣祀皆修而民不告勞政教兼舉而人不知德可謂循良首稱者不可枚數此直紀其一端云

新建文昌祠記

見職名 盧洪

州治之西文廟側有文昌祠昔人以爲主文衡設也弘治末年孝宗遺弓之變革焉州之耆老王鼎相相與謀曰南郭演武亭百步許有大阜四端可愛登之仰則參差巍峨觀望無際俯則滂騰澎湃一瀉千里山川秀麗悉在目下勝景也衆聞忻然各出貲以爲首倡於是州人庶民子來瓦石木植不約而至鼎等秉心至公雖茶不私遂築石爲基豎木爲室延道流楊元清以奉香火建文昌祠於前繪真武像於後祠下有臺臺下有門通人往來誠棲神之境於州有益焉考之保德自春秋時屬晉蕞爾彈丸之地處乎重巒雪浪之間密邇邊陲蓋亦危矣建祠以鎮乎中似亦有見矧文昌張公顯於周末世傳九十七化其神功默運足以鎮壓乎人心州人賴此得

保德州志

卷十一 藝文中

二十六

安堵者是固地利亦种之功之所寓祠成於正德三年周公山暨今三十餘載未有能志之者會首王彧楊廷玉高爵恐泯其事徵余爲文余亦嘗設祖道於此素得其詳因書之以爲記

重修文昌各廟碑記

見前 王邵

郡設山巒大河環之蓋恆之北極也恆自燕雲鳩代迤折訖茲宜有注脉匯精地而郡屹其巔真天作然南關地靈之欲墜而先升處也離兆文明昔人艷之貌文昌帝君於上而閣其道真武拱北關帝八蜡龍神秩秩次之大哉觀乎創於正德戊辰越百禩而南宮朱郡伯飭之歲時禋享烝髦琢章或折柳賦驪筵都矣然其飭主仍其式廓南樓耳圮之極未有若邇年庚辛之慘眸者寇燹兵蹂無尺寸淨土神人胥恫余與韓友友范郭友天德偕計偕入謁潛潛不忍仰視遂矢日冠進賢即亟茲舉旣而予珥毫木天二友皆分符巖邑各緘俸郵之里又郵告於延撫陳公得續若下而社英類俊熙熙焦焦者悉力輸恐後凡五閱月落成其頡宇繚垣槩易磚石斬可久

增緇舍若干楹贍以田使職焚修啓閉唯恣蓋廟南數武即關之門閣道則重門原我郡扼要地曩寇至時峙重兵於此誠當關切計乃嘯喙者風鶴倒戈險予敵使憑而攻我義士唾之故新廟妥神抑自急其戶是綱疇云役得已乎董之者首善陳嘉言余男立本敦延之以底厥績第其績嘉言亦自駭日余他構多矣以材以工與時相較皆什伯良非神力不至是而守兵之設之命適渙於斯廟奕奕時是又鄉者長叫九閭嗟誰極而夕上朝俞奇奏焉將無亂厭泰來鞏若廟以救若民惠我無疆總神功伊濯哉安知非我輩懼災畏神警警覺遷如不及之一念於以廣孔曼盥有孚而賜之生活也則夫我堅斯心神秩斯祐巍第建旗作霖介黍慝則殄良則翼永奠嶽河於億萬載惟吾邇善承之文昌非昌周者乎孝友而薄代匡王之烈彪能無儼格思而興起矣乎

重修文昌各廟並捐置膳田記

見前 姜宗呂

郡即於疲百事就窳寧止里井閭寥不忍寓目即南郭文昌各廟爲棲神所亦復瓦

保德州志

卷十一 藝文中

二十七

礫荆藁蒙陞覈砌見者非不有欲新之志如獨力難勝何歲乙巳河曲尹田公攝篆茲土精敏嫺吏事力以興頽振敝爲己任偶公餘行春郊洞見廟貌荒蕪狀畫焉心傷遂捐俸爲紳士倡鳩工戒事甫浹月而埽堞嚴陳簷阿峻飭瓦甍榱桷煥然改觀又念廟曠斯廢養瞻無具曠所由來復捐俸買附郭地若干畝糧價四至如左從此焚修其中者糊口有資掃除葺理職有專責即此經營區置纖悉必詳其治他務之不屑以傳舍代庖視也可概見已公諱思孔號印尼奉天鐵嶺人

創建三官廟記

見前 劉希皋

萬曆己卯余陟守保德喜其民質樸勤儉有陶唐氏遺風越明年眚災流播自北而西數千里生民呻吟伏枕有瘼其首醫診莫辦何症旬日頓踣者相望余甚憫之偶憶長老有言三官靈應嚮著寰寓禦災捍患往往而然是不可無專祠乃上南郭以棲神予捐俸倡始有衆併力効勞仍置貲曆令耆民陳天和等領之創正殿奉神中峙重樓傍列鐘鼓門起綽楔越二載落成余時陟二果州濱行民遮道請記許之竊

念茲舉大合祭法方其創始即起吾民伏枕間矧徼福方來是誠不可無記大都神即我心我心即神乃孝弟忠信所以感通神明者在我矣是何待疾痛而呼災患而禱然後稱靈應哉

新修護國顯王廟記

正見學 薛澍

神姓崔氏諱某世爲祁州鼓城人唐貞觀中舉孝廉第爲長子令秉心公直政立化行摘姦發伏民不忍欺改任淦陽庶事綜理民無冤抑除猛虎害屏巨蛇襖爲當代正臣去久而見思邑人爲之立祠開元間陳書請謚始封

顯聖護國嘉應侯自時厥後歷代崇奉有加無已故所至之處肖其像而祀焉保德市之東有神行祠金皇統九年郡人張舜元刱建也正隆初孔目張愈置公祠於殿庭之西東向罹壬辰雲擾雖脫於兵燼之餘歲月綿遠風雨侵剝土木摧腐上漏下墊昔之僅存者傾覆俱盡皇元大德甲辰春郡民李廷顯等顧共百十年廟貌一旦咸爲瓦礫場慨然有修復志乃先捐己貲誘化郡中之賢者相與忼力僦工市財易

保德州志

卷十一 藝文中

二十八

甃構以正殿繚以周垣堦砌以石門有扁榜繪塑神像金碧鮮明顧瞻內外百廢具興實足以竭廣虔而妥靈凡經營制度廷顯之功也落成之日一二同志俾予記其興修之始末辭不獲已因紀其實云

以上廟社

創建天橋舖記

見進 崔士成

州東去三十里名曰天橋爲河保分域郡志天橋跨漢是也韓公守郡之明年循良課最政有餘閒時以事東出道無候館慨然嘆曰不備數椽其貴人星 旅食而弧宿者將幕天席地乎遂卜基鳩工爲正署三楹聳然軒豁東西兩廂矯翔如翼前有門外有坊高其閨闔越月事竣公邀僚友具壺觴往落成焉既至憑高四望翠峯峙其南黃河環其北雪浪東傾飛流西漱其懸崖斷壁釣艇漁磯罔匪觸目而快心也公舉酒屬客曰山河之勝亦郡之大觀也哉已而日曛酒酣公忽仰而思俯而嘆焉客曰飲酒樂何爲嘆乎公曰吾思之而吾不言吾言之恐客投觴於地而莫予飲也客不東睇燕雲乎此則秦晉咽喉榆柳衝道溝檄羽書星飛而電發者皇華日載道

也吾騷然有送往迎來之思焉南盼高原崎嶇磽角風起沙龍春多旱亢秋苦早霜農夫偃僂終歲婦子一飽無時吾愴然有啼饑號寒之思焉及西眺兩灘陽侯爲崇昔之錦茵綉谷今爲滔滔巨浸膏腴沙壓而催科不貫棟宇萍浮而徵發愈煩吾惻然有蠲租賑貸之思焉迺若北望邊塞林莽極目每秋風飈揚牧馬悲鳴盈盈一水堅可慮吾又倏然有折衝禦侮之思焉吾是以不憚於此而嘆也客起謝曰余聞食人之食者當憂人之憂遂罷酒而爲之記

天橋交界碑記

見前 姜宗呂

天橋窄口原屬州地其浪花飛雪濤勢轟雷爲八景之尤紀在州志厥後因漁利者越畔遂有異議殊愧虞芮化郡侯徐公來守州乃正其疆理立石志之邇歲因潢池弗靖碑遂毀蓋好人乘機以便侵軼耳令復請於上紀石垂後附言於陰夫尺地寸宇總屬王土何必有彼此之分况所爭不過步武其事似小殊不知所係者大也蓋先王區別疆域建長設尹使分地而治如農有畔未可尺寸紊今天橋因地而論屬

保德州志

卷十一 藝文中

二十九

州無疑乃施罟者貪河中之得而越其界地方或有他故則諉曰此州界也是尸利壑害烏可訓乎茲既補立碑記爭喙自息而復記以小言使後之觀者知所爭在大體而非以微利起所誌示久遠而不止爲目前計則可以已築道之謀並可以銷盈庭之訟越畔者能無當焚圃之柳而瞿瞿耶

鷹窠嶺石橋記

見職名 晁端稟

定羗之南二十里有峻嶺焉蓋所謂鷹窠嶺也嶺下大澗其源甚遠傳曰自寧化雪山神谷掌流入穹廬之地在朔州之西神武會谷之東胡會川絕流無水澗成乾澗遇雨即流以至神武谷川上下胡會接柳河川餘三百里乃出東界而復還漢境過下川郊桔槔村然後至於石橋之下亦經百里貫入大河每驟雨則暴雨汎溢驚浪沸騰其吼如雷其激如矢往返之人壅不克渡隔岸阻艱動經浹旬或天雨霽明訖無微雲點綴白日照耀千里澄徹俄而深溪涸澗卒然溢漲則駟石衝岸人不及走指顧之間接踵而溺一歲之間不可以數計上黨之大商王繼宗者自長沙涉大江

過汝入洛販易真茶歷千里而至河東數十年間拯人濟衆曾莫之吝乃發願出財思救苦難遂相視古道之西不踰數里得石峽焉日之曰石門峭崖峻壁巍如削出兩勢相闔呀然成谷宛若故基天與助其深廣幾千尋焉疊石爲岸跨岸爲橋日鐫月磨殫極智力古人所謂未雨何龍不霽何虹者也起工於嘉祐六年之春而訖工於七月之秋其役功盈禹其用錙餘三十緡其經畫趨辦則繼宗領護營葺則講僧誠圓又以溺者之橫夭爲可傷憫乃納金於官而度一僧俾之持誦以薦冥福其殊方異域源流之遠得以通於中國水之幸也往來之人脫其艱險之憂而就彝易之樂人之幸也當四會之衝致四方之物其來不絕而其至無留物之幸也建一功而三利興是宜爲文以信乎後世之傳也於是乎書

修建惠民井橋并八蜡廟記

見學張瑜

凡橋所以便往來濟徒涉也保德城在山巔取水郭外下上輒里許汲者必喘汗始獲人已病其難矣郭西南有井甘冽顧其難尤甚焉間以谿谷緣木而進雨集蹉跌

保德州志

卷十一 藝文中

三十

泥濘沒脛至不得升夫人非水不生活而其難如此長民者不可不爲之所也至正德己巳太守王公始來聞之慨然以爲己責越明年政通人和迺督工礱石爲橋逾時而成長八丈廣一丈九尺崇一丈八尺司訓宋君大振謂予不可無言以紀歲月余惟保德久有此井緣木汲水一木朽仍易一木往來者負重而畏苦曾無人念及焉而公爲之財不知費民不告勞是則可記也橋之成與八蜡廟相後先廟所以禦災捍患橋所以濟人利物一以敬神一以恤民敬神恤民居官之能事畢矣公諱汝安字靜之陝右邠州鄉貢進士

永濟橋記

在石梯山下

見前王邵

橋之成竟於藐茲吾子之手吾子之成之也以予室病且劇爰傾厥奩兼號許許而鼎其構也計予奉節過此尙以厲揭次且俄自楚旋而橋已屹然而室已霍然若是乎濟人自藥修揅應如響歟懿哉敬姜之言矣凡人逸則淫淫則忘善忘善則惡心生勞則思思則善心生予郡瘠土也丁寥寥戕於寇凡幾于兵凡幾于疫荒又凡幾

予室予子數十年來負痛扶傷以有今日者也勞也善衆善輾焉橋之逸庶幾永乎而有進焉橋進山峻若登梯形頗阨要降是乃垣遊無碍直薄城下今石輪其下而輒穹其上一夫當之虎豹雄矣是爲郡增一鍵也設險以守又得無冥合與猗我人斯小大王民也遵王涂維王土是保豈其協力締之而不同心捍之以奠此萬年不拔者將若此珉何

以上驛舍橋梁

輒獄記

見前崔士成

輒獄確也言實確人情僞也又謂之牢言所在堅牢也夏曰夏臺殷曰羑里周曰囹圄即三代未之或廢也保獄歲久傾圮上漏下濕垣墻低薄可俯而窺且溷獄神於狴犴雜婦女於圜扉甚非所以恤民瘼而威奸宄敬鬼神而禁淫慝也其他蠹孔弊竇罷累傾頽之狀大都類此今年夏父母韓公自祁來守茲土甫下車慨然與民更始焉先是本州地糧先收折色復糴本色賠費不貲民甚苦之公首申允徑徵本色蠲火耗免尖收計省民財歲不下千餘金而民困大蘇如絕戶軍百有餘名每行

保德州志

卷十一 藝文中

三十一

清勾民抱駢毋之憂公懇請開除而民始帖席其聽訟折獄朗若懸鑑而斷如莫邪頃即指而示之曰某也直某也曲某也入某也原吏書有空腹而立已耳他如革常例以裁冗費清倉庫以免虧賠飭城垣以資保障時操練以戒不虞三越月而庶務鱗集輻輳舉矣乃臨獄讞囚具見廢狀遂煥然鼎新之於內正建刑房廳三間爲宿守計東西各建房數間表裏輒石又建小房二間以處獄卒其外四面輒石甃砌砮如城闕高二丈許圍二十餘丈南開一寶門以鐵裹之立獄神於外東向而祠之西南東北二角各立舖舍以便巡瞭別創女監一所墻垣門扇室爐俱如之外則土築大墻圍數百丈高二丈有奇上環以棘而下爲更道是役也其磚石取於公餘其材木出於俸金其工役作於軍壯倣載於本年七月六日泊九月七日而事竣焉因命成爲記余考之易曰雷電皆至豐君子以折獄致刑又曰澤上有風中孚君子以議獄緩死蓋其慎哉若公之此舉五美備焉洒掃燠咻寒暑不苦仁也遏抑禁錮強梁俛首義也奉神明而不瀆敬也別男女以明微禮也不勞民不傷則而刑獄以清官

守以肅又何智也即易所稱何以加此不寧惟是其修芹藻之宮立蛟龍之石繪先哲之坊緝吏書之廡美意良法又有在於修獄之外者以其關政體切民生併記之以垂不朽

漏澤園記

見恩
拔 馬上錦

漏澤園者廉訪趙公所建蒿里地也公飭部以來邊烽不警關河晏然生聚教訓爲三關保障萬曆庚子冬越春瘟疫大作燕齊秦晉之間人多死者而保德爲劇一時木價騰漏新塚纍纍四門日出靈輻不絕號哭之聲聞於遠近其貧不能葬死無所歸者則委之壑噫可悲哉公廉狀惻然曰哀哀蒸民誰令至此極也西伯澤枯豈異人任耶乃移檄州守購地以立漏澤園時州守韓公素厪民瘼奉命間會議民吳學禮城南岡壠一區闊三十畝願輸之官公雅重其義給冠帶懸扁表揚而以其地樹坊顏額繚以周垣貧而死者其骸始有所歸公之澤詎不溥哉夫人生有魂有魄魂魄靡定或倚附草木作爲妖祟傷天地之和召水旱之災爲厲滋甚是役也固以瘞

保德州志

卷十一 藝文中

三十二

骸掩骼亦以燮陰調陽於民晷造化非小補已抑又有不漏澤而澤者見疆場之臣未諳方略易談軍旅撫懷不得其道預備不得其方挑怨起釁兩軍相薄呼吸之頃伏屍蔽野公之備邊也養銳氣撫邊塞內有給牛饗士之風外無飲馬窺關之寇數年間屍場不染草野無膏生者安井伍而死者獲首丘伊誰之賜此其澤涸哉微乎噫泰山之雲觸石而出膚寸而合不崇朝而徧天下公之澤方無量矣斯園其涓涓者乎韓守勒石以垂不朽爰記此以志君子之澤云

田侯建設義塚記

見前
陳奇瑜

嘗攷西伯求寧觀成澤及枯骨迄今揚文德者謂太和在成周宇宙間天啓癸亥田侯以維楊令左遷山西布政司炤磨來署州篆利無不舉弊無不革三閱月境內大治復念及貧不能瘞者爲之惻然遂慨捐俸金買州民張元造地一區立爲義塚界翁仲於四角州人立石誌不忘徵予記其事予維天下干戈尋於邊塞覆尸蔽野說者謂調燮之無人得公調燮一州者調燮天下則太和之治不獨在成周已公諱所

賦字獻廷山東進士 以上獄塚

太守袁公德政去思碑記

元開元路韓順理
儒學教授

國家建官設職欲期於治牧守之政修治理而稱其職者由其才與能也若牧守才與能矣而不爲之表揚則何以期治而勸群僚哉至正己亥之九月府谷軍界河而營乘逆寇釁越境殺掠州民請救於武州樞密院吳公公命袁公至州府谷之衆聞公威名旋踵渡河公命寅牧修城隍守禦之具撫安老穉生者歸死者葬民得安居寧寢者皆公力也故留公之軍守禦城池越明年庚子樞府推公才能請於朝特除知是州居歲餘軍民悅服公之學識儒吏咸優而善於用兵樞府喜公任用之凡糧儲科役期於省減而不至於絕乏總兵官或以後期怒公公具以民困爲言慷慨激烈無怖色傅曰柔亦不茹剛亦不吐公之謂也以故分派徵發時稱平允嘗往來戎馬間百姓戴香斗踞道左以謝民之愛公如此其誠也嗚呼昔之牧易今之牧難蓋國家承平之日賦役刑名悠悠可辦國家多事之時軍糧浩煩期會峻急公之爲民

保德州志

卷十一 藝文中

三十三

驗多寡察有無勸率有方庶務咸理者無私心故也方之古人龔黃可比倫矣公光州人從遼陽中書叅知政事洎公樞密院判來牧是州御煩理劇者宜不止此他日居巖廊處清要其識量宏遠剛直果斷任重之大器也州人士建碑以紀公德政徵予文遂樂道之如此

太守高公德政去思碑記

見署
官 姚謙夫

嘉靖乙未冬公由濟南判來守保德幾二載政以民生人才爲急古良吏也臺院鹽司交薦以爲地方得人慶辛酉秋以公前判濟南錢糧未結奉 旨謝職公得報卽深衣大帶北面稽首曰某不能盡職罪誠深重而罰止於此再生之恩也卽爲文請代略無慍色竟歸去致政鄉官白君銳監生徐君璘等來揖予而言曰我父母胡爲乎去哉若輩衰朽人也乃加之以優禮歲時遺問獨至焉其禮義如此何忍於去也繼而生員賈子光生等來揖予而言曰我父母胡爲乎去哉若輩生於邊方問學茫然我父母特加訓誨建齋舍豐廩餼一時人文彬彬客歲荒歉賑恤貧寒多所全活

其教養之恩如此何忍於去也已而里老吳世儒江倉等匍匐下泣告曰我父母胡爲乎去哉民有子弟公建社學以教之民有邊患公修城垣以坊之民遭饑饉公開倉廩以賑之今日得免於死亡流離誰之賜也民苦徭役之重公去逃亡損其戶數以輕之往時里甲費用浩繁輒至傾敗公盡革舊弊集金於匣而量其出入有事於官者惟令自拘至卽問理獄無淹禁儒等感愛養之德不啻覆載何忍於去也予聞之泣而告曰士夫小民不忍公之去情也顧去之不忍留之不可思之曷維其已也敢借爲文勒諸堅珉以永厥思可乎遂嘆而允之夫公之先任濟南也民不忍去而思之今任保德也又不忍去而思之公豈有求於民哉惟盡其職而已斯民也三代之所以直道而行也予感公之教愛不忍於公之去其情一也因卽士夫小民之所以告予者而直書之以慰厥思且以爲來者詔公諱岡鳳字鴻治別號寅陽楚邵陵人庚子鄉進士

太守諱公德政碑記

見前 苗朝陽

保德州志

卷十一 藝文中

三十四

政有足以濟時艱爲後法者當著爲令其太守諱公之治保德乎保邊郡素號疲區其尺籍則壤不足當大都之什一又瀕河田廬爲水衝沒全州無所仰給兼之頻年以來四方多事征科煩擾保民益瘠瘠不聊生百度因之以隳時敬廷韓公方尹祁課最擬在選取列而當道以保蔽甚特咨簡之抵治搜弊孔攄石畫卽建議改本色一千二百餘石以便民情銷絕軍一百七十餘名以免清勾核鹽票則詐冒永銷革火耗則上納稱便崇輒獄移宮牆則恤刑剗文之典明纂志書頒家禮則載事維風之綱振河濱漂沒公爲之申免賠糧州城士築公爲之請議磚包繪先哲之坊以勵人心輯吏書之廡以塞弊孔他如此類凡三十餘事次第釐舉至其馱朴不濫剖決如流培桃李飲冰蘖尤親民之所罕儷者不期月間轉危而安易亂而治軫荒疲而賜之生全有成效矣於是保士人相與議曰使君治吾郡善矣脫一旦騰驤而去能必其不久而湮乎盍圖不朽以式來茲也遂礱石而屬文於余余昔承之諫垣得披閱章奏竊慨循良不數數見也或心格於材或材躋於心心格則局曲而不能盡方

材簡則譎張而不能守繩墨要於政無當已公則胞與之氣盎然滿襟具其明足以察機宜敏足以應倉卒卽糾棼盤錯人所猶豫駭愕而不能集者公直談笑而揮耳腹內有陽春而眼底無全牛其何施弗善哉此公之大有濟於保而可爲後法者也刻石紀績誰曰不宜顧余又以簡僻如保而恢閎如公屠龍之技而馴雛小於試矣公行且大受大施以樹鴻駿銘鼎彝斯石殆爲之先乎顧已有爲之先者矣則祁之生祠去思碑也公諱朝貢字邦獻號敬廷壬午鄉進士陝西膚施人

太守鍾公德政碑記

見前 陳奇瑜

自昔談吏治者無如漢代次則唐宋間有之其最者如西蜀有文翁南陽有召杜潁川有黃郭滄州有大鼎諸君子余嘗歷稽往牒大都息盜賊嚴保障禁刁風均糧差實倉庾數事括盡矣而本源之地尤在仁也敏也智也教也良也夫保德黑子一區在禹貢爲荒服後爲樓煩胡所據名曰林胡又名澹林則保德爲虜寇出沒之區從古苦之且地多石磧桑麻星星民多啖糠粒以延日天官使者又置邊州爲度外每

保德州志

卷十一 藝文中

三十五

以疲癯除之強半不肖而民生日濱於危矣天不悔禍五年爲旱看陌上之遺骸觀道旁之菜色殊令人涕下者所幸 鍾老父母下車以來端方持已愷悌宜民視民如子則卓密縣之仁也廷無留牘則蕭永寧之敏也不避盤錯則虞朝歌之智也御民以寬則劉東平之教也無疾心厲色則召穀陽之良也他不具論姑撮其大者如盜倉穀升斗與盜鄉民半菽者必麗於法不少假借州民歌之曰我有枳棘鍾君伐之我有蝨賊鍾君遏之是以犬不吠夜足下生釐而盜賊息矣州城設在山嶺勢如累卵每遇天雨連綿傾圮居多派戶擾奔命爲艱連年來捐俸設處絕不動一夫一役金湯鞏固婦子嘻嘻而保障嚴矣州人有躍冶不馴者動以慈惠誘以良心不悛然後以三尺從事群不逞惴惴斂手州民歌之曰驅蚊大扇炤天蠟燭近亦有賣劍買牛之風而刁風止矣舊例三年編審吏掾高下其手致貧富不均苦甚於茶臨期下檄四野誓以天日里不出里甲不出甲里甲有逃亡者悉與豁免糧必親算丁必親填糧丁有苦累者量從寬政州民歌之曰鐺脚刺史又曰昔無襦今五袴而糧

差均矣州治北界西秦兵馬調發動以千萬計歷年米草一空時有譟譁屋瓦幾裂士民震恐無措連年嘔心瀝血設法催征米豆陳陳相因草束亦堆山插岫而倉庾實矣變荒服爲文明挽林胡爲美俗豈不與西蜀文翁南陽召杜潁川黃郭諸公前後媲美哉今以內艱行矣蓮山棘樹盡爲召伯之棠河水桐枝行棲黃霸之鳳一時士民惟有涕下沾襟耳青衿郭宏基陳司純王受言康亨王家植陳奇璋等同紳弁父老輩走不肖之門懇索一言以垂不朽然我公延人也余濫竽延撫時則我公之才品已先父老而知之蚤矣故敢述閭里歌謠姑撮其一二大略其實未能盡我公之萬一云公諱乾健字健行號體立榆谿人

趙方伯生祠記

崔士成

保德舊土城也依險削成盤紆如壺其兩腋低窳土築補之日起月壤居者惴惴焉抱燕雀處堂之慮萬曆壬寅方伯趙公備兵岢嵐請允甄石包之癸卯告成予得從鄉士大夫父老子弟卜善地鳩工材爲公建生祠三楹而肖像其中焉事幾竣予遂

保德州志

卷十一 藝文中

三十六

以應試春官行越甲辰自西臺觀政奉 旨省親時忻二常君自修署州篆捐俸丹堊吉蠲妥侑雍容成禮已而嘆曰美哉祠也奈何無記以垂不朽乎迺徵文於余余曰噫非常之原黎民懼焉及臻厥成天下晏如也故利不百者不議興茲役也由前而觀再稱三難由後而觀適成四美焉胡以明其然也夫包修之議非一朝一夕矣首鼠者難與慮始而摸稜者竟致中格也此勢之難國計告匱帑藏日虛數萬之貲卽鬼神莫輸也此力之難是歲秋霜殺稼斗米三錢春疫流行十室九病負杵之夫菜色尪羸者旦夕莫必也此時之難公獨毅然破道旁之議行權宜之術賑卹慰勞揀醫調劑卒成金城湯池之功而亦免脫巾道殍之苦國家幅慎萬里雖彈丸黑子咸慮阡危公一舉而登之衽席釋天子西顧之憂何其忠也向也河水一合萬姓惴然父母妻子恆懼不相保今則高枕而臥矣公一舉而貽生民千萬世之安何其仁也逞世廟時掠地焚廬迄今言之髮猶上指公一舉而褫敵人之魄又何其智且武也其難如彼其美如此此郡人之所以感而思思而祝卽俎豆百年果足以爲報乎

常君曰唯唯然公偉人也事其事不尸其功豐其德而廉其名廟貌尸祝毋乃非公意乎予曰考之祭義以勞定國則祀之能禦大災捍大患則祀之卽廟貌尸祀不过修祀典耳非所以迎公意也常君曰知深哉子之言也逐勒石書其言以為記公諱彥號明字古延金明人癸未進士

太守胡公生祠碑記

見歲高騰

保德南據蓮山北枕黃河地磽民貧遇方百里之旱輒捐親戚離井牧數年來官是者多趨趨不任即任亦傳舍視之萬曆辛亥冬父母胡公守茲土目擊凋殘惻然軫念以家視國以子視民見利未嘗不興興之必欲其早見害未嘗不去去之必欲其盡善政縷縷不可更僕數誠所謂淪肌膚洽骨髓矣院臺薦剝累上歲丙辰春擢陞湖廣鄖陽府同知而彈丸之地不能久羈驥足郡民賈邊等思其德僉謀立祠以祀焉乃卜南門外地東西四丈南北五丈五尺構庭三間塑公像壁間分龕繪公歷年政蹟凡四十六款庭前起捲棚三間庭外繚之以垣輝煌炳郁春秋匪懈其亦召之

保德州志

卷十一 藝文中

三十七

棠寇之栢乎邊等仍覓有行上人司香火購東溝園南關地以瞻之嗟呼豈弟君子民之父母民之秉彝好是懿德公之撫綏我境駿烈鴻功巍然與蓮山並峙湛恩濺澤洋然與河水俱長故郡之飲和食德者亦欲鐘饗不移與山水同悠久也雖公之德此不足以為重公之政此不足以為報然見賢思齊聖訓昭然惟願後之人瞻廟貌而思公之得此於民者穆然動高山景行之思則祠之係於州人匪渺小也豈徒曰思公而不得見見公之像曰此我公我公也乎公諱柟字棟隆號再培關西洵陽人

記云唐改郡為州其方鎮有軍額及郡尺籍莫不隸之若其名則各著郡版以令賦役因循變易成兵民異業者其流及於今也今之名制復變於唐若關刺民事而以軍額代州名也又其邊要守捉防奸外寇可有云某軍者非州非邑軍旅之所聚也其出於纍生四郊軍不徹儆遂以為定制乎國朝因唐之制間有使名其直達於京師者政刑榮戟悉同下州保德亦其一也興國中六師平晉置定羗軍景德中稍增

大之易以今名編戶數百駐兵三旅而庫金庾粟頗為豐積蓋以餽輸河外控置津要非守土之用寶元之後宿兵固圉始以著作佐郎吳中通理軍事地狹人寡制度卑陋居是任者資格與出宰等故履歷深厚之士聞唱不顧惟久在縣邑不被薦擢之人乃承命有喜色是以更十三政而鮮有聞人温其亦其一也熙寧八年二月既望始承職事因討吳君而下官稱名氏紀於左方

同知覃公績高祖題名世系記

見學政 武成功

州倅覃公高祖諱宣金末為定羗軍刺史兵革間歿於王事璧間題名記雖風雨剝落其文高祖名諱僅存州中士夫李時中等請文於石以傳不朽况忝同里開頗知公之家世大略公之先德興懷來人也高祖諱宣金加封爵號具於石刻曾祖諱資榮授兵馬都元帥欽授 太祖聖旨便宜行事愚師漆默軒先生狀其實翰林李敬齋先生碣其文祖父諱澄字彥清襲父職入侍 世祖授嘉議大夫出為懷孟河南平灤大尹尋遷司農少卿京兆尹四川道提刑按察使成都省簽省羅羅斯副都元

保德州志

卷十一 藝文中

三十八

帥同知宣慰事翰林姚牧庵先生序銘其神道碑父諱克修字崇敬宿衛裕宗擢為侍史二十餘年授通議大夫出為江南湖北道河北河南道陝西漢中道提刑按察使州倅覃公諱中字禹卿初宿衛 太皇太后鞏下掌典帑藏適丁父艱廕授西華梁縣南樂尹尋遷是州公之弟質先除是州判官復改授淮西道肅政廉訪司照磨官餘族命爵授官者肩背相視稽考高祖自貞佑間加龍虎衛二將軍歷承安泰和崇慶天興歸附 聖朝以迄於今垂二百四十餘年由高祖至公凡五世累世顯宦皆至虎符金紫五世之澤綿遠而不絕豈非祖宗積德之厚以至於茲乎 以上宦蹟

保德守禦錢侯再戰再捷圖記

明進士翰林院侍講 張潮 內江人

皇明正德八年癸酉保德守禦錢侯從大旅敗狄於迺河堡越三歲丙子復敗狄於山庄坪夫茲兩戰耳曷庸紀紀蓋以垂後觀也後觀奈何亂或惟其續也貴或惟其勞也逸或惟其難也觀斯感感斯奮奮斯昌矣圖曷庸紀析厥義也旌功疑伐難武疑玩志疑邇氣疑盈微記則後觀之義其曷彰焉按狀侯名山字靜之世家廬州合

肥自大父隸尺籍於山西以功授百戶再傳及侯日吾世起戎行吾寧習紈綺罔思效尺寸以隕吾家聲耶乃習五兵讀司馬穰苴及孫吳戰陣法期自樹立以丕振前人之休會虜寇偏頭關我旅禦焉侯奮呼疾戰虜敗執俘馘而還再舉亦如之凡兩奏功累轉千戶正侯日席門寵者忘世勳讀父書者易兵事溺豢愛者失義方不有儀象後嗣何觀乃召繪史命之形勢日某也山某也谷某也障塞又命之書日智者陣若斯戰若斯俘且凱若斯歲時饗宴則懸諸庭以令其子暨孫俾世傳而觀焉若乃子孫仰豈不日惟我祖若父出死力躬冒刃矢底茲成績以祚蔭我後人我寧不惟續服淬礪乃或淫沃驕妄以墜厥緒無亦懋建勳庸圖像臺閣尚銘諸旂常鼎彝希蹤往哲表觀百代斯侯之大願乎吁言稱先職不背木也虜在目中不忘戰也式穀似之善論謀也不背本者仁不忘戰者勇善論謀者智仁以孝親勇以忠君智以裕後一物而衆善具斯亦可稱也已仕斯郡及鄰邑者有日朱國信上張宗善民咸樂道人之善將勒之石以傳余知朱君因其請乃爲之記

保德州志

卷十一 藝文中

三十九

表忠記

廬宜

開封三被闖圍左良玉軍潰於朱仙鎮諸路援師從之惟總兵官姜名武與賊相持而甘以身殉是誠得其所矣可謂忠矣名武字我揚保德州人韜鈴騎射皆冠其儕偶舉天啟二年武進士授大同威遠守備崇禎初遷大水峪游擊當是時東事方亟遼藩相繼失守山海外衛單疎經略議築城杏山以遏其衝慮為必爭之地諸將觀望不前名武慨然請行日城北亦不難惟出於不意猝然而往百堵並作以一月訖工比其來爭而崇墉岿然可無患矣如期工果竣遂藩屏山海稱雄鎮制府上其功陞宣府西城叅將邊方旱蟬相繼羣盜蜂起盜魁王科尤傑名武擊斬之地方以寧移守宣府右衛張家口開互市名武勒兵巡緝皆懼其威名無敢謹者蒙古部落款塞乞撫監視中官將殺之以邀功名武堅持不可日禍莫大於殺降縱不為身後計若使邊關從此多事咎將誰歸中官怒反捏詞劾之總督楊嗣昌力白其誣獲免後蒙古卒就撫聞名武曾以此被劾望闕搏頰日姜公實生我世世子孫敢忘德耶

尋擢通州副總兵值邊警崇禎起督師孫承宗於家赴通堵禦承宗以昌平陵寢為重亟議加防且曰吾知諸軍中惟姜名武可當一面耳專檄守昌平解嚴後論功晉秩楊文岳任保定總督求典督標中軍者四顧難其人名武方領忠勇營團練適入謁見之大喜曰非子莫與我共功名者即日題授總兵官管督標中軍事時標將如林而名武忽以偏將得之咸太驚既而知其才略又大服焉十五年闖賊圍開封甚急嚴旨趣將救汴文岳令名武督標下兵先馳赴開封壁朱仙鎮當是時諸軍壁鎮上者毋慮十數萬左良玉最強諸軍方仰其旗鼓為進止而良玉心畏自成名雖救汴實膽胸不敢前見嚴旨屢趣之一夕其軍大譁內哭諸營乘亂掠其馬驟去諸營隨良玉悉奔獨名武一軍堅壁不動或語名武曰賊鋒銳矣左鎮兵最多亦最强且有諸營張其左右翼猶胆落霄奔公以贏卒數千當數十萬方張之寇是驅羣羊而禦猛虎也願公熟思之名武曰吾固知之然此君命也亦將令也戰固死於賊退亦死於法與其退而死何如戰而死之為愈乎侵晨賊大至率親姪姜業隆麾下耿道

保德州志

卷十一 藝文中

四十

明等大呼陷陣格殺數十百人名武身被十餘創至柳樹坡被執與業隆等皆齧磔而死無一降賊者亦無一逃去者文岳聞名武死著其所遺故衣痛哭累日夜特題優卹名武子宗呂亦刺血為書兩疏陳情云臣父廿載從軍捐軀報國卒使有魂難招無尸可裹語甚衷切乃再議加贈特進光祿大夫左都督世廕錦衣衛百戶疏上候俞旨而京師陷矣其後宗呂中本朝順治己亥進士選授濰縣知縣未仕而卒孫櫛中康熙乙丑進士累有政績士林仰之

盧宜日延安逆孽飢驅起飢民趨赴團螻螻名城破陷荊棘高渺渺愁予諸帝子帝子惟解惜金錢謹錄鑰牡而已矣獨推周邸號賢王東書堂開文物侈精鏐環寶埒官家賊所艷心恆在此三築長圍肆力攻矢集其目猶未已天予南顧念懿親羽書旁午疾於駛屈指援兵左最強解甲逍遙舞傀儡一朝抱頭學鼠走刁斗間寂鼓聲死狂犇惟恨趾莫前塵迷白日魂都褫當時止有姜將軍堅壁揮戈旂不靡戰酣熱血滿腔凝罵賊捐軀亦何悔軍中流涕感公誠競逐孤忠填故壘朱仙鎮上望英靈

猶若乘箕遠汴水

保德營創建三廟并較武場碑記

姜宗呂

皇清師武臣力以馬上一區宇王造躑躑聲靈赫濯是以今上特右鷹揚選凡糈廩體制威優以異數宜乎赳赳桓桓者輩出於以慰當宇拊髀思顧疆者任粗暴氣獷弗可馴懦則囁嚅自甘覬庸福一切成敗付之膜外疆場事率不可問類坐此若京周王將軍之守保德營也則有異營肇於明末清因之舊有衙宇有較場俱建之南郊闖逆發難盡燼於兵燹署移之城較武場則鞠為茂草者有年矣夫場以較武場之弗存武可知也京周以己亥秋捧檄來此當簡閱軍容時將若士胥露處旌旗甲杖與瓦礫為伍坐作擊刺率躑躅於荒蕪敗棘中不勝蒿目伺膺思有以新之乃首捐資百金為衆倡鳩工庀材蠲期戒事於場之舊地創廳三間將台一座觀瞻肅矣復於場之左隙立關帝火神馬王三廟為類馮祈報地又貯軍器火藥庫一所所以嚴蓄積而備不虞噫京周可謂區畫有方不負厥職者矣蓋聞將驕卒惰則國不

保德州志

卷十一 藝文中

四十一

可為理若前此之頽圯湮廢兵氣亦為之不揚今皆煥然改觀寧減臨淮當年哉况茲場固將與士之所為朝焉夕焉於斯者矣誠使為將者嫺韜略足智勇撫循以收士心激勸以鼓士氣則蒞茲場也吾知有毅然不辱之色矣為士者明紀律守節制能親上而死長亦有勇而知方則隸斯場也吾知其有屹然難奪之勢矣若止因循苟且委頓不振或偃蹇苛暴囂雜弗戢不惟覩茲場而赭頰將無對神威而志懾耶京周山左名閥少任俠負氣不可一世長乃折節服古倜儻有大志乙未應武舉異等試殿廷選授斯職壞姿偉概亦復敦說稱良守茲將三載凡勤訓練討軍實嚴防守戢驕悍一方屹保障焉茲役特其綜理微密之一端焉爾後之繼起而守茲土者知驕惰之不可為毋沒削以自封毋弛怠以助於敗毋厚樹威罔恤乎士隱毋偏執好上而忘和衷之至誼庶幾入此場也可與治軍旅可與格神明壁壘俎豆傳之永禩焉可矣

陳烈女碑記

明山西巡按御史 劉四端

皇帝四年余以

簡命采三晉之風時晉陽之保德州陳烈女未嫁夫死此古今奇節所關於風紀至大也州守戴君牘其事屬以封旌表余不敢忽諸用是檄本郡之父老周詢之廉得其寔我心惻然有淚如雨蓋此童然者處子也此膏梁家之珠玉也此烈丈夫之所為也若者其甘心焉其父兄禮義之所薰陶與其師保之朝夕與其天性然與夫從來俎豆于士史者代不乏人至以閨閣之媛下于田畯其能饑冀缺之耕舉伯鸞之案抱少君之甕而挽鹿車以相從者幾何哉此猶日以賢配賢也乃郭之不偷如此亦人情之所不堪也矧伊女子能達觀于貧富之先賢不肖之外乎即從來之死貞死烈者亦代不乏人然或嫁娶以後甘苦共焉故死生永托焉乃禮未成于合昏戒未醮于結褵其生其死猶之乎不相屬也矧伊女子能貞信明義而舍命之不渝乎且死生亦大矣舉世皆夫婦也平生有愛晚尚難持乃一面未識之夫絕無顧戀者也矧伊女子能不忘其艱難孤

保德州志

卷十一 藝文中

四十二

苦以死相殉委青春之不惜乎且屬毛離裏者盡人子也垂紳搢笏者盡人臣班動負骭葬則曰死忠死孝猝當大故鼠首百端以圖苟免不暇矧伊女子無君之寵無親之恩也能視死如歸抗節雲霄之上乎境遇不以塞其盟存亡不以易其志父母兄弟之親不能緩留于旦夕天地之大萬物之變不能震撼其精誠貞烈得其死矣夫婦之道盡矣無遺憾矣此可以師百世矣噫孤芳奇節司世道者之所憾乎余初下車方欲悉其狀以聞之

今天子彼時前任徐公會題請其事未幾建坊之

明旨下部矣雖然旌表一時固以冥死節之目裡祀百世尤以慰慕義之心况一十六歲始孩之女視死如歸神魂飄泊何所棲依余復與郡大夫謀之協構祠而奠焉祠有田有租春秋有祭品簿正有主香火者皆大夫之所綜理也額其祠曰陳貞烈廟示不朽也事竣為之記以識不忘

河變記

見拔王所用

州城上據山巔下臨黃河瀕河灘地頗稱饒腴以故民居甚衆叢水茂林景象可觀二百年來民資河利河無損民間有泛漲不過浸汗黍禾計尋丈而已萬曆戊戌六月念四日天偶暴雨轉忽轉徐延三日夜浸塌民舍官署甚多城垣亦傾圮百餘丈橋頭村通行大橋亦被衝去及廿七日連雨不止東西灘畦園瓜蔬盡為淤泥所沒至廿八日夜天地晦暝風雨雷電交作達旦河水瀾岸晡而驟溢潏漾澎湃滄霧吞雲遙望水頭不啻自天而下南抵龜棧北抵府谷厓路高湧數十丈屋浮水上如舟器具牲畜逐浪隨波漂沒始盡居民昏暗倉卒趨避不及爬越石岩墮落山谷一時悲號流離之狀真不忍言上至鉄匠舖下至馮家川延袤百里衝去村疇三十四處官民船二十一艘四望茫茫一片水光民居高阜間有存者餘皆為沙泥壓僅見屋簷及至水落則滿目荒砂無復昔時景象矣嗚呼保德永忠從古以來未有泛濫如是之甚者古云滄海桑田或者此適當其變云余目擊恫悼不能效鄭監門繪圖上聞謹援筆直書俟觀風者采焉

保德州志

卷十一 藝文中

四十二

釣魚臺記

庠生 陳大德州人

釣魚臺者余祖乙酉歲所購也處保郡西在古城村下距城廿五里而遙池臨黃河波流恬息經風雨始作濤聲魚多匯聚於此以故秦晉網者競趨釣臺云初祖以闖寇亂求避兵處無可者乙酉夏避暑園中時有自古城村來者以釣臺對遂欣然偕往見其水石清幽隔絕城市輕儵出水白鷗矯翼釣艇往來碧波間景色殊勝鳩葺之念遂不容已歷三稔始落成焉由古城村坡下轉而東踏小徑甚蛇蜒約五十步至洞門門額鑄天險雄關四字從夙志也門上甃以石洞外三其牕以備觀望洞之上疊以短垣設石卓凳於上登之襟飄飄然如在雲霄中與洞門相接朱碧輝煌者呂洞仙祠也塑純陽像於內旁二童謹若不敢肆者兩楹下設鐘鼓朝夕一擊之山鳴谷應堪滌人塵想左則河伯山神土地祠塑像各一右立禪室欲延羽客主之由城下行數武峭壁崔嵬石洞懸空入洞冷沁人骨斧鑿痕具在留石本來面目耳有警登之堪以禦寇下洞三五步有屋六七間諸僕環處旦夕供薪水及為守禦計旁

樹小門入門復為院院內可容人十數輩搆以三楹專待不速之客題門楣曰釣魚臺不沒其故也從東而下地勢稍低接以石級北則為戩戩館逼近河濱無賓客往來之擾卜室讀書幽靜尤佳級盡處則為斷橋以木障之如得渡旁鑿小洞以為貯粟所鹽米區釜咸取諸此與橋相對而幽深者第二關也入關仰視高楹插漢白雲冉冉盤旋石上却從洞入始得到洞修三丈廣四丈頂蓋以木壁圍以磚四壁懸圖畫笑傲其間渾忘其為山居也有閣外出閣之楹憑空遶以朱欄一望數十里巒層岫複歷歷可覩壁峻甚下**际**漁人如尺蓋即前所見挿漢者每至山空人靜月冷風清倚欄獨坐萬慮皆空殊慊鄙懷壁西穿一洞雖無閣致亦如之下則庖屋在焉外屋二間以藏食物庖畔有井初欲引河水於內喜水自石出不復借諸河取以炊甚甘冽井旁一門別為洞與前洞昆季相倚東西建二臺狀如雉堞即取洞中所遺碎石葺而成土翼兩閣甚嶮秀余祖題曰黃河以為池勿田鑿也青山以為城勿用築也余悅其與釣臺之景適相肖登臺輒誦睠茲釣臺可以全性命可以頤神情余

保德州志

卷十一 藝文中

四十四

祖家務之暇常留居數日恨不能遂處於此卒懼於網也純陽**乩**云自此江山亂紛紛世故來任他風擺浪穩坐釣魚臺祠成復云餐青飲綠原無事深感君為山水居鐘鼓告成纔命駕侶朋環遶又詢余已丑春避亂釣臺乃援筆而為之記

